

**BOSNA I HERCEGOVINA  
FEDERACIJA BOSNE I HERCEGOVINE  
Tuzlanski kanton  
GRAD TUZLA  
GRADSKO VIJEĆE**

## **S T E N O G R A M**

**SA 20. SJEDNICE GRADSKOG VIJEĆA TUZLA ODRŽANE 23. JUNA 2026.  
GODINE U POSLOVNOM OBJEKTU „GRAFIČAR“ SA POČETKOM U 12,00 SATI.**

**- SJEDNICI PRISUSTVUJE 27 VIJEĆNIKA.**

**U Tuzli, juni 2026. godine**

## **ANA PEJIĆ – predsjedavajući Gradskog vijeća Tuzla**

(Intoniranje himne Bosne i Hercegovine).

Poštovani vijećnici Gradskog vijeća Tuzla, predstavnici gradskih službi, predstavnici medija, gosti, otvaram 20. redovnu sjednicu Gradskog vijeća Tuzla.

Konstatujem da prema evidenciji Stručne službe Gradskog vijeća, sjednici prisustvuje 26 od ukupnog broja vijećnika. Za današnju sjednicu svoj izostanak su najavili sljedeći vijećnici: vijećnik Muhamed Čikarić, vijećnica Ajla Šehanović, vijećnik Omer Berbić i vijećnik Mensur Mujezinović, te predlažem da im opravdamo izostanak sa današnje sjednice. Za današnju sjednicu kašnjenje je najavio vijećnik Zlatan Mehmedović.

U skladu sa članom 65. Poslovnika Gradskog vijeća Tuzla („Službeni glasnik Grada Tuzle“, broj 5/22, 14/24 i 5/26), kojim je propisano da „Predsjedavajući obavještava Gradsko vijeće ko je osim vijećnika pozvan da prisustvuje sjednici“, obavještavam vas da je poziv za današnju sjednicu Gradskog vijeća Tuzla upućen gradonačelniku Grada Tuzle i drugim ovlaštenim predlagateljima materijala, sekretaru organa državne službe te svim obrađivačima, pomoćnicima gradonačelnika i rukovodiocima stručnih službi, Upravnoj organizaciji Zavod za urbanizam Tuzla, Gradskom pravobranilaštvu Grada Tuzle, Javnom preduzeću RPC Tuzla – Inkubator „Lipnica“ d.o.o. Tuzla, Javnom preduzeću RTV7 d.o.o. Tuzla, Javnom preduzeću Gradska veterinarska stanica d.o.o. Tuzla, kao i Javnoj ustanovi Narodno pozorište Tuzla, Javnoj ustanovi Narodno pozorište Tuzla, Javnoj ustanovi za predškolski odgoj i obrazovanje „Naše dijete“ Tuzla, kao i medijima.

Evidencija prisutnih na današnjoj sjednici Gradskog vijeća je kod uposlenika Stručne službe Gradskog vijeća.

Podsjećam vijećnike da su, uz materijale za današnju sjednicu, dobili i zapisnik, a svaki klub vijećnika i stenogram sa 18. redovne sjednice Gradskog vijeća Tuzla, održane 27.04.2026. godine.

Da li ima primjedbi na zapisnik?

Ako nema stavljam na izjašnjavanje i molim vas da se izjasnite.

Glasanje je okončano.

Konstatujem da je zapisnik sa 18. redovne sjednice Gradskog vijeća Tuzla, održane 27.04.2026. godine usvojen sa,

24 glasa za, nije bilo protiv i nije bilo suzdržanih.

Obavještavam vijećnike da će se zapisnik sa 19. redovne sjednice Gradskog vijeća Tuzla i zapisnici sa 2. i 3. tematske sjednice usvajati na nekoj od narednih sjednica.

Za današnju 20. redovnu sjednicu Gradskog vijeća Tuzla predlažem dnevni red koji ste dobili u materijalima za sjednicu.

S obzirom da nije bilo prijedloga za izmjene i dopune predloženog dnevnog reda, stavljam na izjašnjavanje dnevni red u cjelini i molim vas da se izjasnite.

Glasanje je okončano.

Konstatujem da je dnevni red 20. redovne sjednice Gradskog vijeća Tuzla usvojen sa, 24 glasa za, nije bilo protiv i nije bilo suzdržanih.

## **USVOJENI DNEVNI RED 20. REDOVNE SJEDNICE GRADSKOG VIJEĆA TUZLA, 23.6.2026. GODINE (broj 01/04-A-8437-2026)**

- Usvajanje Zapisnika sa osamnaeste sjednice Gradskog vijeća Tuzla, održane 27.4.2026. godine

1. Vijećnička pitanja i inicijative

2. Razmatranje i donošenje Rezolucije o podršci očuvanja uloge Ureda visokog predstavnika u Bosni i Hercegovini i evropskom putu Bosne i Hercegovine
3. Razmatranje i usvajanje Odluke o dopuni Poslovnika Gradskog vijeća Tuzla
4. Razmatranje i usvajanje Odluke o grbu i zastavi grada Tuzle
5. Razmatranje i usvajanje:
  - a) Odluke o raspisivanju javnog oglasa za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla (s tekstom javnog oglasa), (JU „Centar za kulturu“ Tuzla i JU za predškolski odgoj i obrazovanje „Naše dijete“ Tuzla)
  - b) Odluke o utvrđivanju posebnih uslova i kriterija za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla
  - c) Rješenja o imenovanju Komisije za izbor članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla
6. Razmatranje i usvajanje:
  - a) Odluke o dodjeli u zakup poslovnih prostorija neposrednom pogodbom Javna ustanova Služba za zapošljavanje Tuzlanskog kantona
  - b) Odluke o dodjeli u zakup poslovnih prostorija neposrednom pogodbom Udruženje HO „Merhamet“ MDD Sarajevo – Regionalni odbor Tuzla
  - c) Odluke o davanju saglasnosti na zaključenje ugovora o zakupu poslovne prostorije sa JKP „Komemorativni centar“ d.o.o. Tuzla
  - d) Odluke o davanju saglasnosti na zaključenje ugovora o zakupu poslovne prostorije sa JU „Centar za kulturu“ Tuzla
7. Razmatranje i usvajanje Izvještaja o radu i poslovanju javnih i drugih preduzeća, čiji je osnivač ili suosnivač Grad Tuzla za 2025. godinu
  - a) JP RPC Tuzla – Inkubator „Lipnica“ d.o.o. Tuzla
  - b) JP RTV7 d.o.o. Tuzla
  - c) JP Gradska veterinarska stanica d.o.o. Tuzla
8. Razmatranje i usvajanje Izvještaja o radu javnih ustanova čiji je osnivač ili suosnivač Grad Tuzla
  - a) JU Narodno pozorište Tuzla za 2024. godinu
  - b) JU Narodno pozorište Tuzla za 2025. godinu
  - c) JU za predškolski odgoj i obrazovanje „Naše dijete“ Tuzla za 2025. godinu
9. Razmatranje Inicijative Komisije za ljudska prava i slobode za ukidanje nepotrebnog zahtijevanja uvjerenja o prebivalištu („CIPS“) od građana i unapređenje elektronske razmjene podataka između institucija
10. Razmatranje zaključka Komisije za ljudska prava i slobode broj: 01/04-A-8839-2026 od 15. 6. 2026. godine
11. Razmatranje izvještaja Komisije za izbor i imenovanja
12. Tekuća pitanja
  - a) Obavještenje JKP Komemorativni centar d.o.o. Tuzla o razlozima prolongiranja izrade Izvještaja o radu i poslovanju za 2025. godinu
  - b) Obavještenje Službe za prostorno uređenje i zaštitu okoline o razlozima prolongiranja izrade nacrt: Urbanističkog projekta sjevernog dijela prostorne cjeline „Stari Grad“ u Tuzli i Odluke o provođenju Urbanističkog projekata sjevernog dijela prostorne cjeline „Stari Grad“ u Tuzli
  - c) Obavještenje Stručne službe Kabineta gradonačelnika o razlozima prolongiranja izrade Informacije o realizaciji integrisane Strategije razvoja Grada Tuzle do 2026. godine
  - d) Obavještenje JKP „Komunalac“ Tuzla o razlozima prolongiranja izrade Izvještaja o radu i poslovanju za 2025. godinu

e) Obavještenje Službe za ekonomski razvoj, poduzetništvo i poljoprivredu o razlozima prolongiranja izrade Izvještaja o poslovanju JU NUB „Derviš Sušić“ Tuzla za 2024. i 2025. godinu

f) Obavještenje Službe za ekonomski razvoj, poduzetništvo i poljoprivredu o razlozima prolongiranja izrade Izvještaja o poslovanju JU Dom penzionera Tuzla za 2025. godinu

g) Obavještenje Službe za ekonomski razvoj, poduzetništvo i poljoprivredu o razlozima prolongiranja izrade Izvještaja o radu i poslovanju JP Pannonica d.o.o. Tuzla 2025. godinu.

Prije prelaska na realizaciju usvojenog dnevnog reda današnje sjednice, podsjetit ću da je Gradsko vijeće Tuzla na sjednici održanoj 28.05.26-e godine, donijelo Rješenje broj 01/04-A-7871-2026, kojim je na dužnost člana Gradske izborne komisije Tuzla imenovana Mirela Karić. Centralna izborna komisija Bosne i Hercegovine je svojim Rješenjem broj 06-1-07-1-35/26 od 11.06.26-e godine, dala suglasnost na navedeno Rješenje Gradskog vijeća Tuzla.

Članom 15. Uputstva o utvrđivanju kvalifikacija, broju, imenovanju, obuci i razrješenju članove izborne komisije osnovne izborne jedinice u Bosni i Hercegovini, broj 05-1-02-602-1/24 od 03.05.24-e godine, propisano je sljedeće:

„Izabrani članovi izborne komisije prije stupanja na dužnost, na posebnoj sjednici općinskog vijeća /skupštine općine potpisuju svečanu zakletvu koja glasi:

„Ovim se zaklinjem da ću vjerno, savjesno i nepristrasno obavljati dodijeljene mi dužnosti i provoditi i poštovati Ustav i zakone Bosne i Hercegovine“.

U skladu sa članom Uputstva, pozivam gospođu Mirelu Karić, izabranu članicu Gradske izborne komisije Tuzla, da pristupi stolu predsjedavajućih kako bi potpisala svečanu zakletvu.

Gospođu Karić, u ime Gradskog vijeća Tuzla i u svoje ime, čestitam Vam i želim puno uspjeha u radu.

**MENSUR ALIĆ – zamjenik predsjedavajućeg  
Gradskog vijeća Tuzla,  
vijećnik Tuzlanske alternative**

Gospođu Karić, u ime Gradskog vijeća Tuzla i u svoje ime, čestitam Vam i želim puno uspjeha u radu, budućem radu.

(cvijeće) (aplauz).

**ANA PEJIĆ**

Stručna služba Gradskog vijeća će potpisanu svečanu zakletvu dostaviti Centralnoj izbornoj komisiji Bosne i Hercegovine.

Nastavljamo sa radom i prelazimo na realizaciju dnevnog reda današnje 20. redovne sjednice Gradskog vijeća Tuzla.

## **VIJEĆNIČKA PITANJA I VIJEĆNIČKE INICIJATIVE**

Podsjećam vijećnike da tačka dnevnog reda vijećnička pitanja i vijećničke inicijative može trajati najduže 30 minuta.

Počinjemo sa:

## **VIJEĆNIČKIM PITANJIMA**

Vijećnička pitanja. Vijećnica Senia Husić. Izvolite. Izvolite, vijećnica Senia Husić. (SENIA HUSIĆ – Samo da steknem uslove za rad). Molim vas, hajte za malo samo tišine i koncentracije. Izvolite.

### **SENIA HUSIĆ – vijećnik SDA – Stranke demokratske akcije**

Ovako. Želim se srdačno da pozdravim. Moje vijećničko pitanje se naslanja na inicijativu vijećnice Berise Ahmetović i više bih voljela da je ona ovaj prvo iščitala svoju inicijativu, al nema veze, evo vijećničko pitanje prvo ide po redu.

Obzirom na činjenicu da je na inicijativu vijećnice Berise Ahmetović, Komisija za ljudska prava i slobode Gradskog vijeća Tuzla, naložila Upravi Pannonica Tuzla, izmjenu i dopunu kućnog reda kako bi se omogućilo kupanje u odjeći koja pokriva cijelo tijelo uz obrazloženje da se i na taj način mogu zadovoljiti propisani higijenski standardi, te imajući u vidu da je navedena informacija javno objavljena i dostupna građanima, postavljam sljedeće vijećničko pitanje.

Zbog čega uposlenici Pannonica Tuzla i dalje na ulazu u kompleks panonskih jezera ne dozvoljavaju ulazak ženama koje nose burkini ukoliko je takva odjeća dozvoljena važećim kućnim redom?

Naime, nakon što je javnost upoznata sa informacijom o izmjenama kućnog reda, brojne građanke Tuzla koje koriste burkini prilikom kupanja došle su na panonska jezera već na početku kupališne sezone 26-e godine, očekujući da će moć koristiti usluge kompleksa pod jednakim uslovima kao i svi drugi posjetioči. Međutim, prema njihovim navodima, na samom ulazu su zaustavljene, odbijen im je ulazak uz obrazloženje da se radi o neadekvatnoj odjeći za kupanje, te su vraćene kući. Takvim postupanjem, ove žene...

### **ANA PEJIĆ**

Samo malo, Senia, molim vas. Zamolit ću vijećnike koji su izašli iz sale da uđu, jer nemamo kvorum u sali.

Dajem pauzu od deset minuta.

(Pauza).

Nastavljamo sa radom sjednice. Pozivam vijećnicu Seniu Husić da pročita svoje vijećničko pitanje. Molim vas samo za malo tišine i koncentracije. Izvolite Senia.

### **SENIA HUSIĆ**

Evo, ja moram sad ponovo (ANA PEJIĆ – Naravno, izvolite). Moje vijećničko pitanje se odnosi, znači, na, nadovezuje se u stvari na inicijativu vijećnice Berise Ahmetović. Komisija za ljudska prava i slobode Gradskog vijeća Tuzla naložila je Upravi Pannonica Tuzla izmjenu i dopunu kućnog reda, kako bi se omogućilo kupanje u odjeći koja pokriva cijelo tijelo burkini, uz obrazloženje da se i na taj način mogu zadovoljiti propisani higijenski standardi, te imajući u vidu da je navedena informacija javno objavljena i dostupna građanima, postavljam sljedeće vijećničko pitanje.

Zbog čega uposlenici Pannonica Tuzla i dalje na ulazu u kompleks panonskih jezera ne dozvoljavaju ulazak ženama koje nose burkini ukoliko je takva odjeća dozvoljena važećim kućnim redom, odnosno trebala je bit dozvoljena važećim kućnim redom?

Ja neću dalje dužiti, samo ću apelovati na Upravu Pannonica Tuzla da bez odlaganja osigura dosljednu primjenu važećih propisa i prestanak svake prakse koja može predstavljati diskriminaciju građanki po osnovu njihovog načina odjevanja. Međutim, ukoliko se ovakva praksa nastavi i ukoliko se ženama već od danas ne dopusti da ulaze u burkiniju i da koriste svoje pravo kao građanke grada Tuzle, kao žene, jer smatram da se ovim krše prava žena, bit ću primorana da zajedno sa građankama pokrenem sve zakonom dozvoljene i demokratske aktivnosti radi zaštite njihovih, odnosno naših prava, uključujući organizovanje mirnih protesta i drugih oblika građanskog djelovanja. Pozivam sve žene, kako one koje nose hidžab i burkini, tako i one koje to i ne čine, koje ne nose to, da stanemo rame uz rame u zaštiti prava, dostojanstva i sloboda svake žene. Zaštita od diskriminacije, pravo na jednak tretman i poštivanje ljudskog dostojanstva nisu pitanja koja se tiču samo jedne grupe građanki, već temeljne vrijednosti svakog demokratskog društva. Niko ne smije biti javno ponižen, osramoćen ili uskraćen iz javnog života zbog svog uvjerenja, identiteta ili načina odjevanja, ukoliko postupa u skladu sa zakonom i važećim pravilima.

Zato očekujem hitno očitovanje nadležnih i konkretne mjere koje će osigurati jednako postupanje prema svim građanima i građankama grada Tuzla. Još jednom upozoravam, danas već to treba da bude realizovano. Hvala.

**ANA PEJIĆ**

U redu. Sljedeća vijećnička pitanja. Vijećnica Svjetlana Kakeš. Izvolite.

**SVJETLANA KAKEŠ – vijećnik SDP – Socijaldemokratske partije Bosne i Hercegovine**

Hvala predsjedavajuća. Koristim priliku da pozdravim sve prisutne. I ja imam, čini mi se, tri vijećnička pitanja. Jedno je prema Zavodu zdravstvenog osiguranja i Domu zdravlja, a pitanje slično Zavodu zdravstvenog osiguranja. Pitam da li u svom programu aktivnosti za kojih je zadužila i Vlada i Skupština Tuzlanskog kantona, vezano za primjenu ABA terapije za djecu sa poteškoćama u razvoju iz autističnog spektra, da li znači u svom programu aktivnosti planiraju model i sredstva finansiranja stručne edukacije zaposlenika odnosno zaposlenica javnih zdravstvenih ustanova sa područja TK, uključujući i Dom zdravlja Tuzla, kako bi stekli profesionalni certifikat primjenjene biheavioralne analize za rad sa djecom, kojim su dijagnosticirane poteškoće iz ovog spektra, kao i da li su planirali sredstva za provođenje ovog programa.

S tim u vezi, postavljam i pitanje Domu zdravlja. Da li u okviru Doma zdravlja, gdje djeluje i Centar za psihofizičke i govorne poteškoće, Centar za mentalno zdravlje, u čijem sastavu je i Centar za rani rast i razvoj, u kojima rade i stručno i kompetentno osoblje, da li i Dom zdravlja planira da se uključi u ove eventualne programe edukacije odnosno specijalizacije i da li će omogućiti edukaciju za sticanje ovih certifikata za svoje uposlenike?

Sljedeće pitanje je za Službu za komunalne poslove. Kada će se pristupiti izgradnji ulične rasvjete u dijelu Mjesne zajednice Ljepunice na dionici raskršća Mramor-Dobrnja?

I sljedeće pitanje je takođe za Službu za komunalne poslove. Da li su u toku 2026. godine, planirali nastavak postavljanja taktilnih traka, taktilnih oznaka za slijepe i slabovidne osobe na saobraćajnicama koje su u nadležnosti grada Tuzle i ako jeste, koje su to lokacije, te da li su prilikom određivanja lokacija konsultovali predstavnika Udruženja osoba oštećenog vida, odnosno Savjeta za osobe sa invaliditetom koje je formirao gradonačelnik?

**ANA PEJIĆ**

U redu. Sljedeće vijećničko pitanje. Vijećnica Berisa Ahmetović. Izvolite Berisa.

**BERISA AHMETOVIĆ – vijećnik SDA – Stranke demokratske akcije**

Pozdravljam sve prisutne. Ja zaista nisam znala da će evo kolegica Senia, nismo bile u kontaktu, ovaj da su se i njoj građanke našeg grada i evo i van grada jel javljale povodom ovog pitanja, tako da i danas koristimo svoje pravo, haman nam je to jedino i ono što je ostavljeno, a to je da pričamo o tome tako se ovaj grad i ovaj organ ponaša. Tako da evo, zasad ćemo to iskoristiti, a dalje ćemo vidjeti kako i šta, makar ćete nas evo danas slušati na taj način. S tim u vezi postavljam, obraćam se Kolegiju Gradskog vijeća povodom kontinuiranog ignorisanja zaključaka Komisije za ljudska prava i slobode od strane Komunalnog preduzeća Pannonica d.o.o. Tuzla, a u vezi sa pitanjem zabran korištenja kupaćeg kostima, tipa burkini, na kompleksu panonskih jezera.

Naime, Komisija za ljudska prava je tokom 2025. razmatrala navedeno upitanje, te je zauzela stav kojim je jasno ukazano na postojanje diskriminatorne prakse i potrebu usklađivanja kućnog reda sa principima jednakosti i zabrani diskriminaciji. Međutim, prema dostupnim informacijama, ovo preduzeće nije postupilo prema zaključcima Komisije, niti je poduzelo mjere radi otklanjanja uočenih problema. Naprotiv, tokom tekuće sezone, evidentirani su slučajevi u kojima je ženama koje nosi burkini uskraćen ulazak i korištenje sadržaja panonskih jezera. Postavlja se pitanje zbog čega se dozvoljava da jedno javno preduzeće čiji je osnivač ovaj Grad ignoriše stavove i zaključke radnih tijela Gradskog vijeća, posebno kad se oni odnose na zaštitu osnovnih ljudskih prava građana, u ovom slučaju kako kolegica reče žena? U vezi sa naprijed opisanom tražim sljedeće odgovore. Da li Kolegij Gradskog vijeća smatra prihvatljivim da javno preduzeće ne postupa po zaključcima Komisije za ljudska prava koje je tijelo Gradskog vijeća? Koje mjere planira poduzeti kako bi se osiguralo poštivanje zaključaka radnih tijela Gradskog vijeća, te na koji način će se zaštititi ugled grada Tuzle kao otvorene, multikulturalne i inkluzivne zajednice koja javno zagovara poštivanje ljudskih prava i sloboda svih građana? Grad Tuzla se s ponosom...sa pravom ponosi vrijednostima tolerancije, međusobnog uvažavanja, poštivanja različnosti. Međutim, te vrijednosti moraju biti potvrđene konkretnim djelovanjem institucija i javnih preduzeća. U suprotnom, rizikujemo da naša deklarativna opredjeljenja za ljudska prava ostanu samo formalne izjave bez stvarne primjene u praksi. Ignorisanje zaključaka Komisije za ljudska prava ne predstavlja samo pitanje odnosa prema građankama kojima se uskraćuje pristup javnoj usluzi, već i pitanja poštivanja autoriteta i uloge organa Gradskog vijeća Tuzla. Sjedim vam iza leđa, kolege. Nadam se, ne vidite me. Znači vi odlično kako ja izgledam i mi vrlo rado razmjenjujemo i kafe i osmijehe i kao puno razumijevanje. Tražim od vas da sa obrazom mogu slobodno reći, razmotrite ovo pitanje kada budete zauzeli svoj stav. Žene, mislim da neće biti više prostora i da ne treba biti prostora kolegice za ignorisanje ove situacije. A kolege, vjerujem da će stati u našu zaštitu i imati razumijevanje za navedeno. Hvala.

**ANA PEJIĆ**

U redu. Vijećnička pitanja. Vijećnica Dragana Berberović. Izvolite.

**DRAGANA BERBEROVIĆ GAGRO – vijećnik Naše stranke**

Hvala predsjedavajuća. Pozdravljam sve kolege i medije. Evo ovako. Moje prvo vijećničko pitanje glasi koje su konkretne aktivnosti nadležnih službi Grada Tuzla i drugih

odgovornih institucija poduzete u vezi sa potencijalno opasnom i oštećenom armirano-betonskom konstrukcijom u naselju Slatina? Da li je izvršen stručni pregled njene stabilnosti i sigurnosti za građane, te ko će snositi odgovornost u slučaju eventualnih povređivanja građana i materijalne štete usljed mogućeg urušavanja, imajući u vidu obavezu organa uprave i nadležnih službi da blagovremeno poduzmu mjere zaštite javne sigurnosti u skladu sa važećim propisima o komunalnoj sigurnosti i zaštiti stanovništva?

Ja imam informaciju da smo imali ovo pitanje još na proteklm sjednicama, međutim, do sada se ništa konkretno nije poduzelo. Postavljam ovo pitanje i javno pozivam odgovorne i nadležne i pitam ih ko će odgovarati u slučaju da nastane bilo kakva povreda za nekog od građana Tuzle? Jer želim da konačno službe počnu da rade i da snose odgovornost za propuste.

Drugo pitanje. Koje konkretne mjere nadležna Služba za komunalne poslove Grada Tuzla u sradnje sa Policijskom upravom Tuzla provodi ili planira provesti u cilju sankcionisanja vozača motornih vozila i motocikla koji koriste nehomologirane ili tzv. frizirane izduvne sisteme, te na taj način u naseljenim područjima posebno u noćnim satima proizvode prekomjernu buku i narušavaju javni red i mir, te kvalitete života građana?

Imajući u vidu odredbe Zakona o zaštiti od buke, Zakona o osnovama bezbjednosti saobraćaja na putevima u Bosni i Hercegovini, kao i propise o javnom redu i miru, postavlja se pitanje na koji način će se vršiti kontrola tehničke ispravnosti vozila u dijelu emisije buke? Da li se u praksi primjenjuju mjere poput tehničkog pregleda, isključivanja iz saobraćaja, novčanog sankcioniranja ili privremenog oduzimanja vozila u slučajevima grubog kršenja propisanih normi buke, kako je to praksa u pojedinim evropskim gradovima? Građani opravdano ukazuju da je ovako ponašanje posebno problematično u gusto naseljenim zonama gdje žive porodice s malom djecom, starije i bolesne osobe, te radnici koji ustaju rano, kojima se kroz nesankcionisanje ovakvih pojava narušava kvalitet života. Povodom toga i tražim informacije o trenutnim i planiranim mjerama za sistemsko rješavanje ovog problema.

I još jedno pitanje imam vezano, samo ću kratko, u vezi sa uvođenjem novih gradskih linija Ka i Kb, koje saobraćaju dijelom južne saobraćajnice, te izmjenama postojećih linija. Molim za jasno i detaljno pojašnjenje načina organizacije javnog prevoza, jer iz dostupnih informacija nije moguće zaključiti na koji način je sistem prilagođen stvarnim potrebama građana. Naime, u objavljenom redu vožnje navedena je isključiva vremena polazaka 6, 6:30, 7, i 7:30, bez jasnog podatka da li na njima saobraća jedno ili više vozila, kao ni sa kojeg se tačno polaznog stajališta navedena vremena računaju? S obzirom na dužinu trase, ostaje nejasno na koji način se obezbjeđuje redovan interval i kako građani mogu pouzdano planirati dolazak na poso, školu i druge obaveze. Dodatno ukazujem na konkretan problem da autobus iz Lipnice sada kreće u 6 sati i na Sjenjak stiže u 7:30, dok je u ranijem periodu kretao u 6:20 i stizao na Sjenjak u 7:15. Ova izmjena zajedno sa uvođenjem novih linija, koje očigledno ne prate stvarne potrebe putnika, dovodi do otežanog dolaska radnika i učenika na vrijeme, te stvara praktične probleme u svakodnevnom funkcionisanju. U tom smislu postavljam ovo pitanje, pa bi molila da mi se odgovori, iako sam upućivala mail šefu nadlažene službe, nije se udostojio da mi odgovori. Pa evo, ovako ću. Hvala.

**ANA PEJIĆ**

U redu. Sljedeća vijećnička pitanja su moja. Prilažem. Da li još neko ima vijećnička pitanja? Vijećnik Mirza Malkočević. Izvolite (MIRZA MALKOČEVIĆ – Prilažem). U redu. Da li još neko ima? Vijećnik Samir Mulaosmanović. Izvolite.

## **SAMIR MULAOSMANOVIĆ – vijećnik SDP –Socijaldemokratske partije Bosne i Hercegovine**

E hvala. Pozdravljam sve prisutne. S obzirom da svakako već kasnimo neću čitati, prilažem svoje pitanje. Hvala.

### **ANA PEJIĆ**

U redu. Da li još neko ima vijećnička pitanja? U redu.

Prelazimo na:

### **VIJEĆNIČKE INICIJATIVE**

Vijećnička inicijativa. Vijećnik Mensur Mujezinović. Mensur nije tu. Vijećnik Senad Mehmedinović (SENAD MEHMEDINOVIĆ – Prilažem). U redu. Vijećnička inicijativa. Vijećnica Berisa Ahmetović. Izvolite.

### **BERISA AHMETOVIĆ**

Ajmo još malo. Ova inicijativa ide na postupanje Komisiji za ljudska prava i veže se za isto pitanje koje je postavljeno prema Kolegiju, ali ovdje je samo inicijativa, obzirom da je, hvala Bogu, Komisija za ljudska prava očigledno jedini ovdje organ koji je postupao kako treba.

Naime, obraćam se povodom zaključka Komisije za ljudska prava i slobode Gradskog vijeća Tuzla donesenih tokom 2025. godine, a u vezi sa pitanjem zabrane korištenja kupaćih kostima, tipa burkini. Posjećam da je Komisija nakon razmatranja navedenog pitanja zauzela stav da postoje elementi diskriminacije žena koje iz vjerskih, kulturnih ili sličnih razloga koriste burkini, te je od nadležnog javnog preduzeća zatraženo da uskladi svoj kućni red sa principima jednakosti i nediskriminacije propisanim Zakonom o zabrani diskriminacije Bosne i Hercegovine. Međutim, prema informacijama kojima raspolažem, ovo preduzeće nije postupilo po navedenim zaključcima. Na upit o poduzetim aktivnostima dostavljen mi je odgovor kojim je konstatovano bahato da je informacija primljena k znanju, bez bilo kakvih konkretnih mjera i izmjena kućnog reda. Istovremeno, tokom tekuće sezone zaprimila sam više obraćanja građanki koje navode da im je na ulazu u kompleks panonskih jerzera onemogućen ulazak i korištenje sadržaja zbog nošenja burkinija. Pojedine od njih su doputovale iz drugih gradova Bosne i Hercegovine, snosile troškove puta i boravka, te bile izložene poniženju i neugodnosti u našem gradu. Smatram da ovakve okolnosti zahtijevaju ponovno očitavanje Komisije, te predlažem da Komisija razmotri činjenicu da Javno preduzeće Pannonica nije postupilo po zaključcima Komisije iz 2025. godine. Razmotri navode građanka kojima je uskraćeno korištenje javnog sadržaja zbog nošenja burkinija. Utvrdi da li postoji kontinuirano kršenje principa jednakog postupanja i zabrani diskriminacije, te da zauzme novi stav i predloži dalje mjere radi zaštite osnovnih ljudskih prava i sloboda svih građanka i građanki. Grad Tuzla decenijama, gradi imidž otvorenog multikulturalnog rada koji poštuje različitost. Upravo zbog toga smatram da je neophodno da u ovom slučaju pokaže dosljednost u zaštiti prava, bez obzira na njihova vjerska uvjerenja, način djelovanja i lična opredjeljenja.

U prilogu ovoga i u prilogu inicijative dostavljam mailove koje smo dobili znači putem različitih vidova komunikacije, tako da imate svi na uvid. Također napominjem znači da smo pokušali ostvariti komunikaciju sa gradonačelnikom kako klub, tako i ja lično u pogledu ovog pitanja i evo nadam se i apel gradonačelniku da razgovaramo kako javna preduzeća jel, koja su

evo i pod ingerencijom Grada, krše ljudska prava, krše prava žena. U suprotnom, zaista ćemo biti za dijalog smo, otvoreno, jasno i glasno. U suprotnom, naš klub, to ste vidjeli danas, pristupiće drugim aktivnostima i iskoristiće sva svoja druga prava. Vjerujem da ćete razumotriti navedeno. Hvala.

**ANA PEJIĆ**

U redu. Sljedeća vijećnička inicijativa. Vijećnik Samir Mulaosmanović. Izvolite Samire.

**SAMIR MULAOSMANOVIĆ**

Opet u duhu kašnjenja prilažem. Hvala.

**ANA PEJIĆ**

U redu. Vijećnica Svjetlana Kakeš. Izvolite (Prilažem). U redu. Vijećnik Elvir Fejzić. Izvolite (ELVIR FEJZIĆ – Prilažem). U redu. Sljedeće vijećničke inicijative su moje. Prilažem. Vijećnica Nataša Perić. Izvolite.

**NATAŠA PERIĆ – vijećnik SDP – Socijaldemokratske partije Bosne i Hercegovine**

Hvala predsjedavajuća. I ja prilažim tri inicijative. Dostaviću vam dvije su sa kolegom Zlatanom Mehmedovićem, a jedna sa kolegicom Irmom Mehmedović. Hvala.

**ANA PEJIĆ**

U redu. Da li još neko ima vijećničke inicijative? Vijećnica Dragana Berberović. Izvolite.

**DRAGANA BERBEROVIĆ GAGRO**

Hvala predsjedavajuća. Ja imam tri inicijative, dvije ću kratko samo ovaj pročitati, a jednu ću vam naknadno dostaviti.

Znači, vijećnička inicijativa usklađeno s konkursnih uslova u javnim ustanovama sa važećim propisima iz oblasti zaštite na radu i zaštite od požara. U posljednjem periodu uočava se praksa raspisivanja konkursa za radna mjesta iz oblasti zaštite na radu i zaštite od požara u javnim ustanovama, pri čemu se u konkursnim uslovima značajno sužava krug kandidata u odnosu na važeće propise. Konkretno, za radno mjesto viši stručni saradnik za poslove zaštite na radu, zaštite od požara i obezbeđenje objekata na Univerzitetu u Tuzli, kao i u ranije sličnim konkursima u drugim javnim ustanovama, kao uslov se traži isključivo određeni profil obrazovanja, na primjer, diplomirani inženjer zaštite na radu ili bachelor zaštite okoline usmjerenje zaštite na radu. Međutim, član 5. Pravilnika o uvjetima koje moraju ispunjavati radnici za zaštitu na radu, programu, sadržaju, načinu i troškovima polaganja stručnog ispita, Službene novine Federacije Bosne i Hercegovine 83/21, propisuje da poslove zaštite na radu može obavljati lice sa visokom stručnom spremom tehničkih, medicinskih, prirodnih nauka uz odgovarajuće iskustvo i položen stručni ispit. Inicijativa je još opsežnija, ali evo samo, skratila sam je (ANA PEJIĆ – Molim vas, bez dobacivanja. Izvolite).

Sljedeća vijećnička inicijativa za uspostavljanje transparentnog nadzora nad radom Turističke zajednice Grada Tuzla. Upućujem inicijativu Gradskom vijeću Tuzla i nadležnim

službama Grada Tuzla da se uspostavi jasni institucionalni nadzor, obaveza redovnog izvještavanja i potpuna transparentnost rada Turističke zajednice Grada Tuzla, posebno u dijelu raspolaganja javnim finansijskim sredstvima, provođenja javnih poziva i organizacija javnih manifestacija. Obzirom da se radi o subjektu koji raspolaže javnim sredstvima i učestvuje u organizaciji manifestacija od javnog značaja, smatram da je neophodno osigurati redovno dostavljanje izvještaja o radu i finansijskom poslovanju Gradskom vijeću, kao i javnu dostupnost, javnih poziva i kriterija dodjele sredstava, ugovora i finansijskih izdvajanja, podataka o korisnicima sredstava, izvještaja o realizaciji projekata i manifestacija. U posljednje vrijeme u javnosti se pojavljuju ozbiljne primjedbe i sumnje u vezi sa načinom dodjele sredstava putem javnih poziva, uključujući navode da se javnim novcem finansiraju aktivnosti koje predstavljaju redovno poslovanje privatnih subjekata, kao i tvrdnje da su pojedini izvođači i organizatori manifestacije poznati unaprijed prije formalnog provođenja javnih procedura. Takve okolnosti stvaraju sumnju u transparentnost i jednak tretman svih zainteresovanih subjekata, te dodatno narušavaju povjerenje građana u rad javnih institucija. U skladu sa principima Zakona o principima lokalne samouprave Federacije Bosne i Hercegovine, principima transparentnog upravljanja javnim sredstvima, jednakog pristupa i odgovornosti prema građanima, potrebno je uspostaviti jasne mehanizme nadzora nad radom Turističke zajednice, uključujući obavezu podnošenja godišnjih i periodičnih izvještaja Gradskom vijeću Tuzla. Savremena evropska praksa upravljanja turističkim organizacijama podrazumijeva visok stepen javnosti rada, otvoren pristup informacijama, jasno definisanje kriterije dodjele sredstava kako bi se spriječile moguće zloupotrebe, pogodovanja i netransparentno trošenje javnog novca. To smo mogli...ova inicijativa je naslonjena na skorašnju pojavu da se novac troši na štetne ugovore, tako da smatram da ovo trebamo, oko ovoga treba raspraviti i donijeti neke odluke Gradsko vijeće i da nema niko pravo da raspolaže javnim novcem i sredstvima onako kako on želi. Neka otvori sebi privatnu firmu pa neka radi ovaj na komercijalnoj osnovi ako želi da se dokazuje na takav način.

## **ANA PEJIĆ**

U redu. Da li još neko ima vijećničke inicijative? Nema. S obzirom da nema više prijavljenih za vijećničke inicijative, zamolit ću sekretara Slađanu Krajina da pročita jednu građansku inicijativu koja je pristigla. Izvolite Slađana.

## **SLAĐANA KRAJINA – sekretar Gradskog vijeća Tuzla**

Ja pozdravljam sve prisutne. U skladu sa članom 164. Poslovnika Gradskog vijeća Tuzla i u skladu sa zaključkom Kolegija Gradskog vijeća sa sjednice održane 15. juna 2026. godine, pročitacu građansku inicijativu građanina Hajrudina Arapovića.

Građanska inicijativa za osnivanje Kuće budućnosti Bosne i Hercegovine Centar za djecu, nauku, inovaciju i porodicu u objektu nekadašnji Kina Centar.

Poštovani predsjedavajući Gradskog vijeća, vijećnici i predstavnici Grada Tuzla, obraćam vam se kao građanin Tuzle sa inicijativom koja nije usmjerena samo na današnje potrebe našeg grada, nego prvenstveno na generacije koje dolaze. Kino Centar je decenijama bio mjesto okupljanja, susreta, kulture i zajedništva. Danas kada se otvara mogućnost njegove obnove i novog života, vjerujem da imamo historijsku priliku da stvorimo nešto što ne postoji nigdje u Bosni i Hercegovini. Mjesto koji će biti simbol znanja, napretka, mašte i budućnosti. Predlažem da se nakon renoviranja objekat stavi u funkciju Kuće budućnosti Bosne i Hercegovine, Centra za djecu, nauku, inovacije i porodicu. To ne bi bila obična javna ustanova niti još jedna administrativna zgrada. To bi bio prostor u kojem djeca

sanjaju, uče, istražuju i stvaraju. Zamišljam Centar u kojem sva djeca Tuzle imaju besplatan pristup sadržajima, postoji interaktivni naučni eksperimenti koji posjetioci mogu koristiti i istraživati, radi savremeni digitalni planetarium sa projekcijama svemira, postoji simulatori letenja, željezničkog saobraćaja, upravljanja dronovima, djeluju laboratorije za robotiku, umjetnu inteligenciju, programiranje i nove tehnologije, mladi inovatori i poduzetnici imaju prostor za razvoj svojih ideja, postoji muzej budućnosti Tuzle koji prikazuje viziju razvoja našeg rada do 2050. godine. Vikendom se organizuju edukativni i porodični programi za djecu i roditelje. Poseban dio centra mogao bi biti dječji parlament i Akademija lidera Bosne i Hercegovine, gdje bi mladi učili o demokratiji, odgovornosti ljudskim pravima i donošenju odluka kroz praktičan rad i simulacije rada institucija.

Poštovani vijećnici, mi danas možemo obnoviti jednu zgradu, ali možemo učiniti mnogo više. Možemo izgraditi mjesto koje će inspirisati hiljade djece da postanu naučnici, inženjeri, profesori, umjetnici, poduzetnici i lideri budućnosti. Djeca koja danas kroče ulicama Tuzle jednog dana će voditi naš grad, naše kompanije, naše škole i našu državu. Zato je svaka marka uložena u njihovo znanje i razvoju investicija koja se višestruko vraća cijelom društvu. Tuzla je kroz svoju historiju bila grad slobode, obrazovanja, industrije i napretka. Vrijeme je da postane i grad budućnosti. Vjerujem da bi realizacija ovog projekta predstavljala jedan od najznačajnijih razvojnih i obrazovnih projekata u Bosni i Hercegovini, te bi Tuzlu pozicionirala kao regionalni centar znanja, inovacija i dječjeg stvaralaštva.

S toga predlažem Gradskom vijeću Grada Tuzla, da razmotri ovu inicijativu, pokrene stručnu i javnu raspravu o budućoj namjeni objekta Kino Centar, te uključi građane, obrazovne institucije, stručnjake i organizacije civilnog društva u kreiranje ovog jedinstvenog projekta. Neka Kino Centar ne bude samo obnovljena zgrada, neka postane mjesto gdje počinje budućnost Bosne i Hercegovine.

S poštovanjem, Hajrudin Arapović, građanin grada Tuzla.

## ANA PEJIĆ

U redu. S obzirom da nemamo više vijećničkih pitanja i vijećničkih inicijativa, prelazimo na sljedeću tačku dnevnog reda:

### **Razmatranje i donošenje Rezolucije o podršci očuvanja uloge Ureda visokog predstavnika u Bosni i Hercegovini i evropskom putu Bosne i Hercegovine**

Da li ima potrebe za uvodnim izlaganjem?

Da li ima potrebe za izvještajem komisija?

Otvaram raspravu klubova vijećnika.

Senade, jeste se vi...(SENAD MEHMEDINOVIĆ – Da). Izvolite. Vijećnik Senad Mehmedinović.

### **SENAD MEHMEDINOVIĆ – vijećnik Nezavisne liste „Sloboda“**

Hvala ljepo. Poštovana predsjedavajuća, zamjenice, kolege vijećnici, predstavnici službi, pomoćnici gradonačelnika, sve vas srdačno pozdravljam. Mislim da se treba ova rezolucija komentarsati radi par stvari. To sam govorio i na Kolegiju. Prije svega, mislim da ćete se složiti, da ova rezolucija ima simbolički i politički karakter, a neki mogu da postave nama pitanja zašto mi pišemo rezolucije, zar se ne trebamo baviti nekim drugim stvarima koje se tiču komunalne problematike, al dobro je nekad, naročito u ovim uslovima, da neke rezolucije imaju politički karakter. I uglavnom služe za slanje političkih poruka. Ja moram ovo

da kažem samo lično kao čovjek, kako sam doživio u stvari ulogu visokih predstavnika ovdje i moramo da priznamo neke stvari koje su od koristi za Bosnu i Hercegovinu. Bez visokih predstavnika mi ne bismo imali zastavu Bosne i Hercegovine, ne bismo imali grb, ne bismo imali tablice, ne bismo imali zakon o državljanstvu. I po meni ko je najveći trag ostavio od ovih visokih predstavnika, a bilo ih je, je Pedi Ešdaun i to naročito zbog toga što je nametnuo, odnosno uspostavio Oružane snage Bosne i Hercegovine, Ministarstvo odbrane Bosne i Hercegovine, SIPA-u, tužiteljstvo. I dolazimo sad do posljednjeg ovog visokog predstavnika za kojeg možemo isto reći da je uradio neke dobre stvari za našu zemlju, a jedna od tih stvari jeste sad uvođenje tehnologije u izborima, pa ćemo da vidimo i na općim izborima šta znači model kad se može glasati samo za tri osobe. Drago mi je da je suspendovao neke zakone Republike Srpske koji su mislili da se nametnu kao zakoni iznad države Bosne i Hercegovine, ali mi je žao što je bio pod velikim uticajem, malo ću biti prost onog baksuza Marfija i onda je zajedno s njim učestvovao u nečemu što se zove suspendovanje Ustava Federacije Bosne i Hercegovine na štetu jednog naroda, a to je bošnjački narod i mislim da se nikad u demokratiji Evrope vladavini prava nije desilo da neko na 24 sata suspenduje Ustav jedne zemlje, u ovom slučaju Ustav Federacije Bosne i Hercegovine, odnosno da se vlada mogla formirati tek kada saglasnost da predsjednik i dva podpredsjednika federacije i onda su oni rekli nekom čudnom matematikom i uticajem da to mogu da urade dva naroda na štetu jednog naroda. To je sramota što je uradio za ovu zemlju, bez obzira ne govorim o politikama, govorim o narodima i to se nije trebalo uraditi. Na kraju, smatram da strateški cilj Bosne i Hercegovine treba da bude zatvaranje OHR-a, a jačanje institucija Bosne i Hercegovine i u uslovima u kojima mi sad živimo i okolnostima u kojima mi sad živimo, radimo, djelujemo, nažalost još uvijek je visoki predstavnik potreban ovoj našoj zemlji. Hvala.

## **ANA PEJIĆ**

U redu. Sljedeća diskusija. Vijećnica Svjetlana Kakeš. Izvolite Svjetlana.

## **SVJETLANA KAKEŠ – vijećnik SDP – Socijaldemokratske partije Bosne i Hercegovine**

E hvala predsjedavajuća. Pa, evo ja ovaj u ime Kluba vijećnika SDP-a koji je predlagrač donošenja ove rezolucije, da pored ovih razloga sa kojima se sa većinom diskusije slažem, kolege Mehmedinovića, pored tih razloga da obrazložim zbog čega je Klub vijećnika evo odlučio da predloži donošenje jedne ovakve rezolucije i zbog čega mi kao lokalna zajednica smo se uključili u takvu jednu aktivnost. Klub vijećnika SDP-a u Gradskom vijeću smatra da je baš u vremenu kad svjedočimo o političkim blokadama, osporavanju nadležnosti državnih institucija i sve češćim pokušajima relativiziranja vrijednosti na kojima počiva Dejtonski sporozum, važno da baš i upravo iz Tuzle da se pošalje jasna poruka očuvanju Ustavnog poretka, vladavine prava, Evropskog puta, čiji je garant, htjeli mi to priznati ili ne u ovom momentu, prema Dejtonskom sporozumu, odnosno prema Ustavu Bosne i Hercegovine, a i prema našoj realnosti garant toga svega je Ured visokog predstavnika. Mi ovdje govorimo o instituciji Ureda visokog predstavnika, a ni o jednom pojedincu, odnosno ni o jednom pojedinom visokom predstavniku. Tuzla nije bilo koji grad, Tuzla je grad koji je kroz svoju istoriju bio i ostao simbol zajedničkog života, međusobnog poštovanja, tolerancije, multietničnosti i o tome svjedočimo svi mi, građanke i građane Tuzle. O tome su mnogi pisali, istraživali, pisali naučne radove, pa evo možda ste i propratili, posljednja u nizu je jedna hrvatska naučnica, doktorica Valentina Otmačić, koja u svojoj knjizi, zapravo u svom doktorskom radu, Tuzlu uz Gorski kotar definiše kao oaze mira u pustošima rata, a Tuzlu nazvala „Draguljem Bosne i Hercegovine“, čija iskustva nisu dovoljno poznata niti dovoljno iskorištena. Upravo ta i takva Tuzla ima pravo i obavezu da jasno iskaže svoj stav o pitanjima

koja se tiču mira, stabilnosti i budućnosti Bosne i Hercegovine. A evo kao što sam i navela, jedan od faktora mira, stabilnosti, bržeg puta ka Euroatlantskoj budućnosti BiH, još uvijek je Ured visokog predstavnika koji zajedno sa Vijećem za implementaciju mira, u kojem sjede predstavnici međunarodne zajednice, ima mehanizme za očuvanje stabilnosti jasnog puta ka Euroatlantskim integracijama. I ne zaboravimo, ponavljam, da je uloga Ureda visokog predstavnika definisana Dejtonskim sporozumom, tačnije Annexom 10 sporozuma, odnosno Ustavom BiH. Prema odredbama Annexa 10, sve dok se ne procijeni da su ključni elementi Dejtonskog sporozuma u potpunosti stabilni ili su ugroženi, mandat OHR-a se produžava kako bi se spriječio pravni ili institucionalni vakum. A upravo u posljednje vrijeme smo svjedoci stalnih političkih kriza, blokada institucija na državnom nivou, retorike i poteza koji dovode u pitanje suverenitet, teritorijalni integritet BiH. Takav ambijent ukazuje na neophodnost djelovanja Ureda visokog predstavnika, odnosno na potrebu pružanja što šire podrške i očuvanje i jačanje uloge OHR-a, što mi ovom rezolucijom evo pokušavamo i da učinimo. Smatramo da su lokalne zajednice itekako pozvane da se oglase po ovom pitanju, jer politička kriza u kojoj se nalazimo, blokade, narušavanje suvereniteta i teritorijalnog integriteta, nedostatak vladavine prava, neriješeno pitanje državne imovine i drugi problemi sa najvišeg nivoa, ipak direktno, što direktno, što indirektno utiču na sveukupan ekonomski i socijalni razvoj, na sigurnost, na vladavinu prava, jednom riječju, na bolji život građana koji većinu svojih prava i potreba rješavaju i zadovoljavaju upravo na lokalnom nivou. Kao odgovorna lokalna zajednica, zajednica koja je simbol zajedništva, ravnopravnosti i jedinstva, mi imamo i pravo i obavezu da se oglasimo i da damo podršku uredu OHR-a, institucije koja je garant poštovanja svega za šta se i naša zajednica kroz istoriju zalaže, a naš Ustav to i propisuje.

## **ANA PEJIĆ**

U redu. Sljedeća diskusija. Vijećnik Nedžad Jusić. Izvolite Nedžade.

## **NEDŽAD JUSIĆ – nezavisni kandidat – nacionalna manjina**

Hvala predsjedavajuća. Poštovana predsjedavajuća, zamjenici, kolege, kolegice, vijećnici, vijećnice, poštovani prisutni u sali, želim da vas pozdravim i prije svega želim da se zahvalim Klubu SDP-a koji je podnio ovu rezoluciju, jer je vrlo važna ustanova institucija Visokog predstavnika i ovo, kolega Senad što je govorio, dosta je toga dobrog rekao i podržao bi 100%, što se mene tiče, ali ipak osjetio sam potrebu da kažem jer ipak ovo je zbog javnosti, a možda i ovaj zapisnik dođe, između ostalog i Uredu visokog predstavnika, pa možda nekad neko i pročita i zbog toga želim da napomenem da nam treba Ured visokog predstavnika gdje će svi građani uvažiti...gdje će koristiti sva prava koja su zagarantovana svim zakonskim i pozakonskim aktima kao i određenim deklaracijama.

Ja bih samo, ovo je vrlo važno, možda nije direktno, al jest indirektno vezana za Ured visokog predstavnika. Samo bih podsjetio, 2009. godine, da je presuda donesena u predmetu Sejdić-Finci gdje je ustanovljena diskriminacija u Bosni i Hercegovini, da predstavnici nacionalnih manjina ne mogu se niti kandidovati za člana predsjedništva, odnosno ne mogu biti u Domu naroda Bosne i Hercegovine.

I ovo, kolega Senad, što je govorio da je Visoki predstavnik suspendovao Ustav Bosne i Hercegovine na jedan dan, evo ja ovom prilikom pozivam Ured visokog predstavnika Bosne i Hercegovine da uloži svoju mogućnost i ovlasti, pa ako je potrebno, a jest potrebno i da izmijeni Ustav Bosne i Hercegovine, gdje će se implementirati presuda Evropskog suda za ljudska prava u Strazburu, gdje će se omogućiti kandidovanje svim građanima Bosne i Hercegovine na svim pozicijama u Bosni i Hercegovini, a normalno rezultati će izbori odlučiti

ko će biti na takvim pozicijama i ja ne bih imo ništa protiv da Visoki predstavnik suspenduje postojeći Ustav u dijelu gdje će zagarantovati implementaciju presude Evropskog suda za ljudska prava, a evo ovu priliku bi iskoristio također sad 30-og imamo jednu veliku konferenciju u Parlamentarnoj skupštini Bosne i Hercegovine na ovu temu, također ću, tada ću podnijeti određeni zaključak, ovo bi samo priliku iskoristio da u potpunosti podržavam pomenutu rezoluciju i da treba nam Ured viskog predstavnika u Bosni i Hercegovini. Hvala.

**ANA PEJIĆ**

U redu. Sljedeća diskusija. Vijećnica Berisa Ahmetović. Izvolite.

**BERISA AHMETOVIĆ**

Zahvaljujem predsjedavajuća. Gotovo pa u cijelosti, ovaj, kratko sam se samo evo javila. Podržavam diskusiju kolege Senada Mehmedinovića, de facto i de jure to su činjenice, je li, koje jesu i koje postoje u državi.

Međutim, prije možda dvije sjednice, a evo i da sam napomenula, a evo danas ponavljam, a i u kontinuitetu ću nastaviti. Dok se ovaj organ i ovo Vijeće ne počne baviti poslovima i zadacima koje se njega tiču i koje treba da rješava, za mene će ovo biti suzdržano, za mene će ovakvi akti neće dobivati na mojoj pažnji, niti ću ih analizirati. I evo ja bi samo u kontekstu evo i cijele današnje sjednice još jednu ovaj u tački jedan ovog prijedloga koji kaže tolerancija i zajednički život i uvažavanje i vrijednosti i tako dalje. Dok ovaj grad ne bude uvažavo ove vrijednosti i bio tolerantan na svom lokalnom nivou za što je zadužen, zaista ovakvi akti će od mene lično biti suzdržani i nemaju smisla, a vjerujem evo i da će Klub SDA podržati ovakav stav. Hvala.

**ANA PEJIĆ**

U redu. Da li se još neko javlja ispred klubova vijećnika?

Zaključujem diskusiju klubova vijećnika.

Otvaram diskusiju vijećnika.

Zaključujem diskusiju vijećnika i stavljam na izjašnjavanje prijedlog teksta Rezolucije o podršci očuvanja uloge Ureda visokog predstavnika u Bosni i Hercegovini i evropskom putu Bosne i Hercegovine i molim vas da se izjasnite.

Glasanje je okončano.

Konstatujem da je Rezolucija o podršci očuvanja uloge Ureda visokog predstavnika u Bosni i Hercegovini i evropskom putu Bosne i Hercegovine usvojena sa, 20 glasova za, nije bilo protiv i 3 suzdržana.

Prelazimo na sljedeću tačku dnevnog reda:

### **Razmatranje i usvajanje Odluke o dopuni Poslovnika Gradskog vijeća Tuzla**

Predlagач: Kolegij Gradskog vijeća.

Obrađivač: Stručna služba Gradskog vijeća.

Materijal su razmatrali: Komisija za statutarna pitanja i propise i klubovi vijećnika.

Da li ima potrebe za uvodnim izlaganjem? (Ima). Ima potrebe, jel?

Izvolite. Sekretar Vijeća ispred Kolegija.

## **SLADANA KRAJINA – sekretar Gradskog vijeća Tuzla**

Evo ja ću ispred predlagača Kolegija Gradskog vijeća. Znači, tri vijećnika u Gradskom vijeću Tuzla uputili su inicijativu da se pristupi dopuni Poslovnika Gradskog vijeća Tuzla, na način da se pravo na formiranje kluba da i samostalnim vijećnicima i to da dva ili više samostalnih vijećnika mogu formirati klub. Važećim odredbama Poslovnika nije predviđena takva mogućnost. One su inicijativu obrazložili tako da predloženom izmjenom bi se omogućilo da dva ili više samostalnih vijećnika formiraju klub, čime se unapređuje ravnopravnost svih vijećnika u ostvarivanju njihovih prava u radu Gradskog vijeća. Na ovaj način, kako su naveli, samostalnim vijećnicima omogućavalo bi se organizovanje djelovanje, efikasnija koordinacija rada, zajedničko zastupanje stavova i lakše ostvarivanje prava koje Poslovnik vezuje za postojanje kluba vijećnika. Predloženo rješenje takođe bi omogućilo adekvatniju zastupljenost političkih stavova interesa građana koji predstavljaju samostalni vijećnici. Istovremeno, formiranje kluba samostalnih vijećnika ne bi uticalo na postojeća prava drugih klubova vijećnika. Ovako rješenje takođe su napomenuli prisutno i u brojnim predstavničkim tijelima u Bosni i Hercegovini, jer se pravo na formiranje kluba ne vezuje nužno za pripadnost političkoj stranci, već za potrebu organizovanja vijećnika radi efikasnijeg rada predstavničkog organa. Ovaj prijedlog vijećnika razmatrao je Kolegij na svojoj sjednici održanoj, mislim da je bio 15. juni 2026. godine, prihvatio je taj prijedlog, Stručna služba je zadužena kao brađivač da pripremi tekst izbornih dopuna Poslovnika Gradskog vijeća Tuzla. Ovaj predloženi tekst dobili ste u materijalu podijeljenom za sjednicu Gradskog vijeća. To bi bilo to.

## **ANA PEJIĆ**

U redu. Da li ima potrebe da se pročita izvještaji komisija? Nema.  
 Otvaram raspravu klubova vijećnika.  
 Zatvaram raspravu klubova vijećnika.  
 Otvaram raspravu vijećnika.  
 Vijećnik Emir Šahović. Izvolite.

## **EMIR ŠAHOVIĆ – vijećnik Pokreta demokratske akcije - PDA**

Hvala predsjedavajuća. Pozdrav vama, pozdrav dopresjedavajućim, sekretaru Gradskog vijeća, svim prisutnim.

Ja ne mogu prihvatiti ovu izmjenu, odnosno ovu Odluku o dopuni Poslovnika Gradskog vijeća iz jednostavnog i prostog razloga zato što ona ruši osnovne principe bavljenja politikom. Znači, ako pričamo o volji glasača, meni je prvo i osnovno da glasači koji su dali podršku određenom političkom subjektu trebaju da imaju predstavnike ukoliko ti predstavnici osvoje određene mandate u predstavničkom tijelu. Mi ovdje ćemo napraviti nešto što po čemu je Tuzla bila popularna u prošlom mandatu, a to je skoro polovini broja vijećnika da budu samostalni vijećnici, da one politički subjekti ispred kojih su izabrani u predstavničko tijelo više ne djeluju već da djeluju samostalno. Mislim ako je volja glasača to da samostalni vijećnik djeluje, ja mislim da se to napravi ili nezavisni kandidat ili nezavisna lista i onda nastavi da djeluje, onaj, pod tim imenom. E sad, ovdje znači dva ili više samostalnih vijećnika mogu napraviti klub, pa ja predlažem da svi veći klubovi koji se mogu dogovoriti hajmo po dva vijećnika i hajmo napraviti 15 klubova, onaj, u Gradskom vijeću. Mislim ovo je po meni, po meni, štetna odluka za zaštitu principa u politici i mislim da bi trebali bar taj mandat istrajati i naravno sljedeći put kada budu lokalni izbori kandidovati se ispred nekog drugog političkog subjekta, osvojiti mandat i djelovati ispred drugog političkog subjekta. Hvala.

## **ANA PEJIĆ**

U redu. Da li se još neko javlja za diskusiju vijećnika?  
Zaključujem diskusiju vijećnika i stavljam na izjašnjavanje prijedlog Odluke o dopuni Poslovnika Gradskog vijeća Tuzla i molim vas da se izjasnite.

Dragana, molim vas, izjasnite se.

Glasanje je okončano.

Konstatujem da je Odluka o dopuni Poslovnika Gradskog vijeća Tuzla usvojena sa, 18 glasova za, 1 protiv i 5 suzdržanih.

Prelazimo na sljedeću tačku dnevnog reda:

### **Razmatranje i usvajanje Odluke o grbu i zastavi grada Tuzle**

Predlagač: gradonačelnik Grada Tuzla.

Obrađivač: Stručna služba Kabineta gradonačelnika.

Materijal su razmatrali: Komisija za statutarna pitanja i propise i klubovi vijećnika.

Da li ima potrebe za uvodnim izlaganjem? (Ima). Ima.

Zamolit ću evo predstavnike Stručne službe Kabineta gradonačelnika da nam daju ukratko obrazloženje. Izvolite.

### **ELDINA ČUSTOVIĆ – rukovodilac Stručne službe Kabineta gradonačelnika**

Pozdravljam sve prisutne. Znači, Odluka o grbu i zastavi grada Tuzle, uređuje se izgled sadržaja i osnovne karakteristike grba i zastave grada Tuzle. Znači, predloženom Odlukom ne mijenjaju se postojeći simboli grada Tuzle, koji se koriste još od 1959. godine, nego se njihov izgled po prvi put precizno i jednoobrazno definiše. Na taj način se otklanjaju dosadašnje razlike u primjeni grba i zastave i stvara se osnov za knjigu, izradu knjige grafičkih standarda, kojim se osigurava jedinstvena i dosljedna primjena službenih simbola grada Tuzle u svim službenim dokumentima, publikacijama, promotivnim materijalima i digitalnim platformama. Znači, u dosadašnjoj praksi uočene su različite interpretacije i grafička rješenja službenih simbola, posebno u pogledu rasporeda elemenata boja i izgleda zastave, budući da ti elementi ranijim aktima nisu bili precizno definisani.

Također, na Kolegiju Gradskog vijeća i gradonačelnika usaglašeno je da se boje za grb i zastavu, koriste boje, koje se koriste za zastavu Bosne i Hercegovine i kao što ste u materijalima dobili, to bi bio, znači, izgled i boje grba. Grba na svijetloj podlozi zastave i grba na tamnoj podlozi. Ne znam jel potrebno još?

## **ANA PEJIĆ**

U redu. Ako bude nekih pitanja tu ste svakako.

Da li ima potrebe da se pročitaju izvještaji komisija? Nema.

Otvaram raspravu klubova vijećnika. Da li se neko javlja?

Vijećnik Senad Mehmedinović. Izvolite Senade.

## **SENAD MEHMEDINOVIĆ**

Ja imam samo prijedloge, dva zaključka. Dakle, ne bih diskutovao, obzirom da smo pričali o ovoj temi. Slađana, dostaviću vam zaključak.

Prvi je, zbog čega su prvo ovi zaključci? Zbog toga što je praksa da dobar dio mjesnih zajednica, pa evo i udruženja, kako god hoćete, kad se koristi grb grada Tuzle, ispade ko da Tuzla ima pet ili sedam različitih loga ili grbova i zato u tom kontekstu imam prijedloge ova dva zaključka.

Zadužuje se gradonačelnik Grada Tuzle da, putem nadležnih gradskih službi, dostavi primjerak Odluke i Knjige grafičkih standarda svim mjesnim zajednicama na području grada Tuzle, javnim ustanovama i javnim preduzećima čiji je osnivač Grad Tuzla, kao i udruženjima građana, sportskim klubovima, organizacijama i drugim pravnim licima koja u svom radu koriste grb, zastavu ili druge simbole grada Tuzle, radi njihove pravilne i jedinstvene primjene.

Drugi je. Zaduguje se gradonačelnik Grada Tuzle da putem službene internet stranice Grada Tuzle učini javno dostupnim službene digitalne verzije grba i zastave grada Tuzle, zajedno sa Knjigom grafičkih standarda, kako bi svim korisnicima bila omogućena njihova pravilna i jednoobrazna primjena. Hvala.

**ANA PEJIĆ**

U redu. Da li se još neko javlja za diskusiju ispred klubova vijećnika?

Zaključujem diskusiju klubova vijećnika.

Otvaram diskusiju vijećnika.

Vijećnik Samir Mulaosmanović. Izvolite.

**SAMIR MULAOSMANOVIĆ – vijećnik SDP –Socijaldemokratske  
partije Bosne i Hercegovine**

Kratko ću, samo da pohvalim ovu Odluku, jer ovde smo napokon odlučili da budemo pismeni i grad ima svoj simbol, zastava ima simbol i ovo smo pretočili u dokumentu u kojem se decidno govori o čemu se radi ovde. Tako da mislim da neće biti više prostora ni za kakve čudne žute, plave boje i sve ostalo. Ima potreba i obaveza znači da bude sve unificirano, tako da podržavam ovu Odluku i svaka čast na tome. Hvala.

**ANA PEJIĆ**

U redu. Da li se još neko javlja od vijećnika?

Zaključujem diskusiju vijećnika i stavljam na izjašnjavanje prijedlog Odluke o grbu i zastavi grada Tuzle i molim vas da se izjasnite.

Glasanje je okončano.

Konstatujem da je Odluka o grbu i zastavi grada Tuzle usvojena sa,

25 glasova za, nije bilo protiv i nije bilo suzdržanih.

Zamoliti ću sekretara da pročita zaključke.

Da li ste za da glasamo zajedno o oba zaključka ili odvojeno?

Izvolite Slađana.

**SLAĐANA KRAJINA – sekretar Gradskog vijeća Tuzla**

Prijedlog zaključaka:

1. Zaduguje se gradonačelnik Grada Tuzle da, putem nadležnih gradskih službi, dostavi primjerak Odluke i Knjige grafičkih standarda svim mjesnim zajednicama na području grada Tuzle, javnim ustanovama i javnim preduzećima čiji je osnivač Grad Tuzla, kao i udruženjima

građana, sportskim klubovima, organizacijama i drugim pravnim licima koja u svom radu koriste grb, zastavu ili druge simbole grada Tuzle, radi njihove pravilne i jedinstvene primjene.

2. Zadužuje se gradonačelnik Grada Tuzle da putem službene internet stranice Grada Tuzle učini javno dostupnim službene digitalne verzije grba i zastave grada Tuzle, zajedno sa Knjigom grafičkih standarda, kako bi svim korisnicima bila omogućena njihova pravilna i jednoobrazna primjena.

**ANA PEJIĆ**

Molim vas da se izjasnite o pročitanim zaključcima.

Glasanje je okončano.

Konstatujem da su pročitani zaključci usvojeni sa,

25 glasova za, nije bilo protiv i nije bilo suuzdržanih.

Prelazimo na sljedeću tačku dnevnog reda:

**Razmatranje i usvajanje:**

**a) Odluke o raspisivanju javnog oglasa za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla (s tekstom javnog oglasa), (JU „Centar za kulturu“ Tuzla i JU za predškolski odgoj i obrazovanje „Naše dijete“ Tuzla)**

**b) Odluke o utvrđivanju posebnih uslova i kriterija za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla**

**c) Rješenja o imenovanju Komisije za izbor članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla**

Predlagач: gradonačelnik Grada Tuzla.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanja (pod c) i klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika i da li ste za da se o svim podtačkama izjasnimo jednim glasanjem? U redu.

Stavljam na izjašnjavanje prijedlog Odluke o raspisivanju javnog oglasa za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla (s tekstom javnog oglasa), (JU „Centar za kulturu“ Tuzla i JU za predškolski odgoj i obrazovanje „Naše dijete“ Tuzla), pod

**b) Odluke o utvrđivanju posebnih uslova i kriterija za izbor i imenovanje članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla i pod**

**c) Rješenja o imenovanju Komisije za izbor članova nadzornih odbora iz reda stručnih radnika zaposlenih u javnim ustanovama čiji je osnivač Grad Tuzla i molim vas da se izjasnite.**

Glasanje je okončano.

Konstatujem da su pročitane odluke i rješenje usvojeni sa,  
20 glasova za, nije bilo protiv i 5 suzdržanih.

Prelazimo na sljedeću tačku dnevnog reda:

**Razmatranje i usvajanje:**

**a) Odluke o dodjeli u zakup poslovnih prostorija neposrednom pogodbom Javna ustanova Služba za zapošljavanje Tuzlanskog kantona**

**b) Odluke o dodjeli u zakup poslovnih prostorija neposrednom pogodbom Udruženje HO „Merhamet“ MDD Sarajevo – Regionalni odbor Tuzla**

**c) Odluke o davanju saglasnosti na zaključenje ugovora o zakupu poslovne prostorije sa JKP „Komemorativni centar“ d.o.o. Tuzla**

**d) Odluke o davanju saglasnosti na zaključenje ugovora o zakupu poslovne prostorije sa JU „Centar za kulturu“ Tuzla**

Predlagač: gradonačelnik Grada Tuzla.

Obrađivač: Služba za geodetske i imovinsko-pravne poslove, evidenciju i upravljanje imovinom.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo i klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika i možemo li se o podtačkama jednim glasanjem izjasnit?

Može.

Stavljam na izjašnjavanje Odluku o dodjeli u zakup poslovnih prostorija neposrednom pogodbom Javna ustanova Služba za zapošljavanje Tuzlanskog kantona,

**b) Odluke o dodjeli u zakup poslovnih prostorija neposrednom pogodbom Udruženje HO „Merhamet“ MDD Sarajevo – Regionalni odbor Tuzla,**

**c) Odluke o davanju saglasnosti na zaključenje ugovora o zakupu poslovne prostorije sa JKP „Komemorativni centar“ d.o.o. Tuzla**

**d) Odluke o davanju saglasnosti na zaključenje ugovora o zakupu poslovne prostorije sa JU „Centar za kulturu“ Tuzla i molim vas da se izjasnite.**

Glasanje je okončano.

Konstatujem da su pročitane odluke usvojene sa,  
25 glasova za, nije bilo protiv i nije bilo suzdržanih.

Prelazimo na sljedeću tačku dnevnog reda:

**Razmatranje i usvajanje Izvještaja o radu i poslovanju javnih i drugih preduzeća, čiji je osnivač ili suosnivač Grad Tuzla za 2025. godinu**

**a) JP RPC Tuzla – Inkubator „Lipnica“ d.o.o. Tuzla**

**b) JP RTV7 d.o.o. Tuzla**

**c) JP Gradska veterinarska stanica d.o.o. Tuzla**

Predlagač: skupština preduzeća.

Obrađivač: direktor preduzeća.

Materijal su razmatrali: Komisija za ekonomske odnose, Komisija za poduzetništvo, i klubovi vijećnika.

Da li ima potrebe za uvodnim izlaganjem? (Nema). Nema.

Da li ima potrebe da se pročitaju izvještaji komisija? Nema.

Hoćemo li jedno po jedno preduzeće?

## **Evo JAVNO PREDUZEĆE RPC TUZLA – INKUBATOR „LIPNICA“ D.O.O. TUZLA**

Otvaram raspravu klubova vijećnika.

Vijećnik Mirnes Ajanović. Izvolite.

### **MIRNES AJANOVIĆ**

Hvala. Pozdrav svima. Pa, mi smo već skoro prije nešto više od pola godine razmatrali sve ove izvještaje na kraju godine. Ali, naravno, dužnost je proći i kroz ovaj izvještaj, gdje je evidentno da je preduzeće ostvarilo ciljeve zbog kojih je osnovano. Ovo je podrška razvoju poduzetništva, samozapošljavanju i otvaranju novih radnih mjesta. Završilo je sa pozitivnim finansijskim rezultatom. Međutim, ja sam više puta govorio da ove okolnosti javnih ustanova ili preduzeća ne moraju bitno biti vezane za pozitivan finansijski rezultat ako ostvaruju društvenu korist, pa i na način ako je potrebno to nešto finansirati iz budžeta, a daje evidentno korist. Tako da, jeste pozitivno, ali za mene nije presudno. Mi imamo ovdje i pozitivna mišljenja nadzornog odbora, odbora za reviziju, nezavisnog revizora. Evo imamo još podatak da su kapaciteti namijenjeni start-up kompanijama u potpunosti popunjeni. Postoji interes za poduzetništvo, dakle i ovaj projekat, evo, pokazuje da ima svoju punu svrhu i opravdanost. Evo i sada, nije ovo klasično profitno javno preduzeće, nije dakle ovo svrha ostvarivanja neke velike dobiti, pa da kažemo evo, oni su dobri, nego ovo upravo je svrha razvoja malih i srednjih preduzeća, pružanje podrške poduzetnicima, stvaranje novih radnih mjesta i to je ta dobit. Ne mora biti samo ta uslovno-finansijska materijalna, konkretna, nego mi kroz ovo dobijamo dobit omogućavanja građanima da, evo, mogu i ovo preduzeće koristiti na način da, evo, ostvaruju svoju ličnu dobit, a to jeste cilj društva, kako obezbijediti svima da mogu egzistirati, kako obezbijediti da svako bude zbrinut. Za mene je suština politike i postojanje politike da političar razmišlja i osmišljava i troši vrijeme, energiju za mandat kako nekome da bude lakše, bolje, da neko ne bude u krizi, da svi imaju, može bit da je to utopija, ali meni je lakše ići ka tome da se društvo bori za situaciju da svi budu zbrinuti, nego da svako bude ostavljen sebi, a onda to skoči na nos i onima koji imaju. Nije mi jasno kako se to ne shvata da je sigurnost i onih koji imaju sigurnost onih koji su u krizi da ne budu u krizi. Al hajde, to je neka druga tema, a ovo je sada evo kroz ovo preduzeće iz ovog razloga govori ne mora to biti niti neka velika dobit, nebitna je dobit je što postoji, što na ovaj način egzistira, tako da što se mene tiče mogu dati prijedlog, a ne moram zaključak, dakle, da podržimo preduzeće i dalji razvoj svega ovoga što rade. Hvala.

### **ANA PEJIĆ**

U redu. Sljedeća diskusija. Vijećnik Miza Malkočević. Izvolite Mirza.

### **MIRZA MALKOČEVIĆ – vijećnik Naroda i pravde (NIP)**

Hvala. Pozdravljam sve prisutne. Evo pokušat ću da budem kratak, većinu stvari je kolega Mirnes iznio, ali moram prije svega da iznesem veliku zahvalnost i pohvale direktorici

koja pored evo svog savršenog, možemo slobodno reći, posla koji radi na ovoj poziciji, dosta toga ulaže u lokalnu zajednicu gdje se nalazi upravo Inkubacioni centar i Narod i pravda, tj. Klub Naroda i pravde će podržat ovaj izvještaj. Još jednom joj se zahvaljujem u svoje ime i ime građana sve tri Lipnice na konstantnoj podršci.

**ANA PEJIĆ**

U redu. Sljedeća diskusija. Vijećnik Admir Hasanbašić. Izvolite Admir.

**ADMIR HASANBAŠIĆ – vijećnik Tuzlanske alternative**

Hvala predsjedavajuća. Evo, složio bi se sa izlaganjima kolege Mirze i Mirnesa, tako da se neću ponavljati u tom segmentu, ali ono što je jako bitno jeste da je ovaj izvještaj urađen po metodologiji, a imali smo i izmjene za ovu godinu i vidim evo da je urađeno i anketiranje korisnika usluga ovog javnog preduzeća i ta anketa je pokazala da su korisnici veoma zadovoljni uslugama ovog javnog preduzeća.

Naime, uprava je veoma odgovorna i evo, dobili smo uvijek odgovore na naša vijećnička pitanja, vijećničke inicijative i svakako poštuju se zaključci ovog Gradskog vijeća.

Dalje. Menadžment na čelu sa direktoricom je aplicirao na veliki broj projekata i evo ovdje u izvještaju možemo vidjeti dva projekta koja su dobili finansijska sredstva od Fonda za zaštitu okoliša Federacije Bosne i Hercegovine i Federalnog ministarstva razvoja, poduzetništva i obrta, što je za veliku pohvalu, što znači da menadžment ne miruje, ne čeka samo sredstva Gradske uprave odnosno Budžeta Grada, nego se vrši edukacija i vrši se apliciranje na sve projekte na nivou države. Ono što nije moguće i navedeno je u izvještaju ne može ovo javno preduzeće da aplicira na projekte međunarodne, zbog toga što vlasništvo ovih prostora nije u vlasništvu javnog preduzeća, nego je u vlasništvu Rudnika uglja Kreka i tu je jedan od velikih problema koji se nameće u narednom periodu i upravo zbog toga je i vizija ovog preduzeća za naredni period navedena za tri godine do 2029. godine, a ne do 2030., jer upravo 2029. godina je ključna, jer tada ističe ugovor o zakupu prostora koji je sklopljen sa Rudnikom uglja Kreka. Nadam se da će se i produžiti tako da će naše javno preduzeće i dalje nastaviti sa radom i da će se i dalje razvijati javna preduzeća koja egzistiraju, odnosno firme koje egzistiraju u ovim objektima i prostorima.

I svakako Klub vijećnika Tuzlanske alternative će podržati ovaj izvještaj i iskrene čestitke svim uposlenicima javnog preduzeća na čelu sa direktoricom. Hvala.

**ANA PEJIĆ**

U redu. Sljedeća diskusija. Vijećnica Svjetlana Kakeš. Izvolite Svjetlana.

**SVJETLANA KAKEŠ**

Hvala predsjedavajuća. Evo ja u ime Kluba želim takođe da potvrdim da je pred nama detaljan, precizan, sveobuhatan izvještaj, koji sadrži sve potrebne informacije o radu i poslovanju ovog javnog preduzeća u prethodnoj godini. Mnogo toga je, sa čime se i mi kao Klub, mogu u ime Kluba takođe da kažem slažemo, mnogo je rečeno u prethodnim diskusijama. Iz svega navedenog i rečenog, iz dosad postignutih rezultata, kako iz ove informacije o poslovanju za prethodnu godinu, a takođe iz saznanja koje imamo o poslovanju iz prethodnih godina, vidi se da RPC Lipnica u potpunosti ispunjava misiju i viziju koju je osnivač postavio pred njih još prije više od 20 godina, evo kao što sam i rekla da je u prethodnoj godini postigao više nego zadovoljavajuće rezultate.

Ja bih se naslonila na diskusiju kolege Ade i podsjetila bih na neke od naših, pa i ranijih, a takođe i prošlogodišnjih zaključaka kad smo razmatrali izvještaj za 24-u. I kad smo, između ostalog, baš vezano za imovinski status prostora na kojem djeluje RPC Lipnica, uputili i određene zaključke i inicijative prema Vladi i Parlamentu Federacije. Napominjem, kao što je napomenuto da jedna od prepreka za nastavak još ozbiljnijeg razvoja i apliciranja na međunarodne fondove, IPA i druge EU fondove, pa i za značajnija ulaganja vlastitih ili sredstava Grada ili drugih donatora, je činjenica da RPC, odnosno Grad Tuzla, još uvijek nisu ili nisu vlasnici objekata i zemljišta. Podsjećam da smo tad usvojili zaključke, pa ajde, bili su malo opširni, pa neću vas zamarat da ih citiram, da ih ponavljam, ali smo uglavnom u ovom smislu uputili zaključke prema Vladi Federacije i Parlamentu, da se pokuša izmjenama aktuelno Zakona o rudarstvu u Federaciji BiH omogućiti da se imovina prebaci u vlasništvo Grada Tuzle, odnosno da se omogući nastavak rada RPC Lipnica na ovom prostoru. Podsjećam, ja ne znam koliko je puno materijala, zaista dobivamo što tokom sjednica i što između sjednica, ali evo, ako vam je promaklo, izjašnjavajući se po ovim zaključcima Gradskog vijeća, odnosno po inicijativi koju smo na osnovu našeg zaključka uputili i Predstavničkom domu, Vlada, Premijer Federacije BiH je u aprilu ove godine Gradskom vijeću uputio iscrpno izjašnjenje, koje evo ja ovdje imam, ali ima ga i u Stručnoj službi. Stručna služba je to nama dostavila, izjašnjenje kojim se ne prihvata inicijativa Gradskog vijeća uz obrazloženje da prema Zakonu o rudarstvu Federacije nakon ispisa dijela eksploatacionog polja ili kompletnog eksploatacionog polja iz katastra odobrenih eksploatacionih polja, prestaje nadležnost Ministarstva za oblast rudarstva kao i primjena propisa iz te oblasti, odnosno primjena Zakona o rudarstvu, te da bi prenos nekretnine Rudnika Kreka eventualno trebalo rješavati sporazumom između Rudnika Kreka i Grada Tuzle, odnosno u skladu sa imovinsko-pravnim propisima, Zakonom o stvarnim pravima i drugim. Tome, naravno, bi trebalo da prethodi utvrđivanje vlasništva i niz drugih procesnih radnji. Ovo je samo ukratko, pa ja bih mogla reći i laički, pošto nisam ni stručnjak iz imovinsko-pravnih odnosa, ni iz rudarstva, pa je laički parafrazirano izjašnjenje Premijera Federacije, ali u vezi sa ovim našim zahtjevom je jasno da se ovo pitanje ne može riješiti u skladu sa Zakonom o rudarstvu, nego na drugi način.

Stoga, predlažem sljedeći zaključak:

Imajući u vidu Izjašnjenje Premijera Federacije BiH, broj 562/2026 od 09.04. Slado, pogrešno sam bila napisala 19-og, od 09.04.2026. godine, kojim se Vlada Federacije izjasnila da ne prihvata inicijativu koju je podnijelo Gradsko vijeće putem Zastupničkog doma Parlamenta Federacije, kojom se traži da se u okviru izmjena Zakona o rudarstvu ili posebnim zakonom riješi pitanje statusa napuštenih nekretnina i rudarske infrastrukture po okončanju eksploatacije rude i da se takve nekretnine prenesu u trajnu svojину lokalnih zajednica na čijem području se takve nekretnine nalaze, u svrhu organizovanja privredne aktivnosti koja će omogućiti nova upošljavanja, te da prioritet bude prenos svojine napuštenog Rudnika Lipnica, u svrhu poslovanja i razvoja RPC Tuzla - Inkubator „Lipnica“, Gradsko vijeće preporučuje gradonačelniku i nadležnim gradskim službama da u ime Grada Tuzle, a nakon sagledavanja svih imovinsko-pravnih pitanja, stupe u komunikaciju sa Vladom Federacije u cilju iznalaženja najboljeg, na zakonu zasnovanog rješenja kojim bi se regulisao prenos svojine napuštenog Rudnika Lipnica na Grad Tuzlu, a u svrhu nastavka poslovanja i razvoja RPC Tuzla - Inkubator „Lipnica“.

**ANA PEJIĆ**

U redu. Sljedeća diskusija. Vijećnik Senad Mehmedinović. Izvolite Senade. Izvinjavam se. Replika. Vijećnik Mirza Malkočević prvo. Izvolite.

## MIRZA MALKOČEVIĆ

E, hvala vam. Prije evega evo samo da se zahvalim kolegici na ovako dobrim zaključcima. Samo da se nadovežem na ovo, da podržavam i potpunosti zaključak, jer smo imali već upite od tri firme iz Evropske Unije vezane za metalnu industriju, ali koje, nažalost, nisu mogle da potpišu ugovor, zato što imamo ugovor do 2029. godine i mislim da bi trebali urgentno djelovati, u skladu sa zakonom i što prije da nađemo način da prebacimo, vlasništvo na Grad Tuzla zbog same lokalne zajednice grada Tuzle, jer sama infrastruktura koja se trenutno nalazi u Inkubacionom centru, rudnička daje mogućnosti za otvaranje velikih pogona i jako velikih firmi. Hvala.

## ANA PEJIĆ

U redu. Sljedeća diskusija. Vijećnik Senad Mehmedinović. Izvolite Senade.

## SENAD MEHMEDINOVIĆ

Hvala vam. Ja prvo želim da pohvalim Inkubator Lipnica, zbog toga što su usvojili prijedlog zaključka koje ovo Vijeće donijelo, a to je da su kao odgovorno preduzeće i digitalno pristupačni za populaciju osoba sa invaliditetom. Dakle, usklađena je web stranica, znači ovo je jedno u nizu od javnih preduzeća koje je postupilo po zaključku Gradskog vijeća, što znači, jel tako da i osobe sa senzornim oštećenjima mogu da prate aktivnosti Inkubatora, al ne samo to, obzirom da je svrha ovog Inkubatora razvoj malih i srednjih preduzeća, možda jedan nako savjet u budućnosti da se razmišlja i o podsticanju preduzeća za zapošljavanje osoba s invaliditetom, što bi bila fantastična priča za područje grada Tuzle, da dakle, radimo na promovisanju tog modela razvijanja preduzeća, a što je u skladu sa Zakonom o profesionalnoj rehabilitaciji, osposobljavanju i zapošljavanju lica s invaliditetom i tu bi mnogi trebali da znaju koliko benefita taj zakon donosi kako za populaciju osoba s invaliditetom, tako i za mala i srednja preduzeća ili obrte ili preduzeća za zapošljavanje osoba s invaliditetom, pa čak i zaštitne radionice. Da ne otvaram sad tu priču, al evo prijedlog, Inkubator možda da u budućnosti razmišljaju o ovim modelima neke saradnje, pa ako treba da organizujemo jedan sastanak da porazgovaramo o tome, jer svi oni koji pokrenu preduzeće za zapošljavanje osoba s invaliditetom imaju podsticaj od Fonda za profesionalnu rehabilitaciju, shodno broju zaposlenih osoba s invaliditetom i shodno procentu stepena invalidnosti osoba s invaliditetom koji bi se zaposlili u to preduzeće ili recimo samostalni obrt. Definitivno ovaj Inkubator poslovni ostvaruje svoju primarnu svrhu, a to je dakle podsticanje razvoja malih i srednjih preduzeća.

U 2025. godini, možemo da vidimo da su poslovale 62 firme, od čega 17 start-up preduzeća i čak 11 novih firmi. Potpuna je popunjenost start-up prostora, što je dobro, i da je iskorištenost većine objekata isto je dobro, međutim ovaj problem jeste problem ugovora sa Rudnikom Kreka, ne problem potpisivanja ugovora, nego zato što je on samo do 2029. godine i bilo bi dobro da se pronađe neki model ili da se uzme na dugoročan period kako bi se ovdje nastavili razvijati ona mala i srednja preduzeća.

E sad, iz izvještaja se također vidi da veliki broj firmi, hajde šta znači veliki, određeni broj firmi, je napustio Inkubator i to šest razvijenih firmi. Šta to znači? Ako je napustio, jer oni ovdje govore svrha mu je podsticanje malih i srednjih preduzeća, jel to u praktičnom smislu znači ona preduzeća koja su narasla, uslovno rečeno pod navodnih znacima, dakle, stali na svoje noge da su razvili biznise, jer to znači kad su oni razvili taj posao i otišli iz Inkubatora, da su oni u stvari otišli, jer su razvili svoj posao i otišli su na neko veće tržište, veće prostore i tako dalje i tako dalje? Ako jest, ako jest, to mi je drago, a drugo, preporučujem da ubuduće u

izvještaju to piše, jer je to veoma bitna informacija za ljude koji sjede u ovom Gradskom vijeću. Dakle, ako neko ode iz Inkubatora, da ne piše napustilo ili otišli, mogu otić zato što su nezadovoljni Inkubatorom, međutim, sasvim je druga informacija ako kažemo da su se oni razvili, da su negdje drugo pogone otvorili, što znači da je njima stvarno Inkubator bio jedna podsticajna sredina gdje su razvili svoje biznise.

Možda u budućnosti takođe nije prijedlog zaključka, nego preporuka direktorici da se samo ne opisuje stanje, nego da ima neka vizija, da postoji neka strategija razvoja Inkubatora, pa možda da razmišljaju u budućnosti, to stavite na nekih par godina, ovaj, kakvi su planovi Inkubatora Lipnica i, na primjer, bilo bi dobro da u saradnji sa Agencijom TRAG, da se aplicira prema različitim evropskim fondovima kako bi se dobijala određena sredstva, pa evo, na primjer, za podsticanje, vjerujte da bi odlična priča bila, evropski projekti za podsticanje zapošljavanja populacije osoba s invaliditetom.

I zakonska regulativa ide u prilog i možemo čak donijeti neke dokumente koji su lokalnog nivoa koji se tiču ovog zakona i fonda, jer se ogromna sredstva mogu povući iz Fonda za profesionalnu rehabilitaciju. I vi imate, na primjer, ako je osoba 60% sa invaliditetom na nivou godine, između 10.000 i 12.000 Konvertibilnih maraka dobije to preduzeće zato što zapošljava osobu kako bi joj refundiralo dio troškova za plate i to je jedna lijepa priča, plus se može dobiti sav neophodna oprema koja je potrebna osobi sa invaliditetom za to određeno radno mjesto i ta sredstva su bespovratna i mogu se koristiti. Ovo su samo neki prijedlozi za razmišljanje u buduću.

Što tiče Nezavisne liste Sloboda, naravno da ćemo podržati ovaj izvještaj. Hvala.

## **ANA PEJIĆ**

U redu. Zaključujem diskusiju klubova vijećnika.

Otvaram diskusiju vijećnika.

Da li se neko javlja?

Vijećnik Nedžad Jusić. Izvolite.

## **NEDŽAD JUSIĆ**

Hvala. Ma, evo, kolege su i kolegice dosta rekli vezano za ovu aktivnost i ovaj izvještaj je stvarno izuzetno kvalitetno urađen i ne samo na papiru nego na djelima se to vidi u ovom preduzeću i siguran sam u tome da će se ovo nastaviti i dalje. Al bi ovu priliku iskoristio, možda i ništa nije slučajno što danas evo imamo pomenuti izvještaj, u toku prošle sedmice sam imenovan za jednog koordinatora za ovaj dio za zapošljavanje Roma između ostalog sa jednom međunarodnom organizacijom Redit koji je finansiran od Evropske Unije i siguran sam u naredne tri godine da ćemo imati izuzetno dobru saradnju sa Inkubacionim centrom i sa menadžmentom pomenutog preduzeća i siguran sam u tome da ćemo imati podršku i da ćemo nastaviti zajedno raditi između ostalog za sve socijalno ugrožene kategorije koje žele da pokrenu svoj biznis, a sa posebnim fokusom na romsku populaciju i siguran sam u tome da ćemo imati ponovo kažem podršku od menadžmenta i evo, znači, ništa se slučajno ne dešava između ostalog prošle sedmice sam eto potpisao ugovor s ovom organizacijom, evo danas imamo ovaj izvještaj, a veže se jedni s drugim i siguran sam u naredne tri godine da ćemo najmanje naredne tri godine dobro sarađivati. Normalno da ću podržati ovaj kvalitetan izvještaj. Hvala.

## **ANA PEJIĆ**

U redu. Sljedeća diskusija. Vijećnik Samir Mulaosmanović. Izvolite.

## **SAMIR MULAOSMANOVIĆ**

Hvala. Samo osnivanje RPC Lipnica prije 20 godina, super vizionarska ideja koja evo vidimo našta je izašla i svaka čast menadžmentu, definitivno broju firmi koje odatle izlaze i rade u mogućnostima gdje vidili smo u tabelama kakve su subvencije sve znači, to je jako pohvalno u kojem pravcu se razvilo. Ono što je kolega Admir naćeo, kolegica Svjetlana je to jako dobro analizirala i taj dio bi skrenuo pažnju koji je jako bitan, Grad Tuzla mora strateški izauzeti pravac i ući u razgovore sa Rudnikom Kreka, kako bi ova firma poslje 2029. i 30-e nastavila dalje da radi. Trenutna situacija je ovako gledajući izgleda loše za RPC Lipnicu, na primjer ako uzmemo samo da je neki zakup od 96.000 hajmo zaokružiti na 100.000 godišnje, gdje po mojim informacijama Rudnik želi da digno to na 300.000 godišnje, što je nemoguće. Neko u pravnoj službi u Rudniku apsolutno izgleda se nije udostojio da pročita ugovor gdje traži to da se uradi aneksom, a u principu u ugovoru jasno stoji da nema mogućnosti dodavanja aneksa. Samim tim Grad Tuzla bi promptno morao da reaguje, jer ne smijemo dozvoliti, Grad Tuzla ne smije dozvoliti da se, hajmo reći, desi nešto loše javnom preduzeću koji ostvaruje izuzetne rezultate. Iz nekih još razgovora sa menadžmentom očigledno je da imamo izuzetno bahato raskalašeno ponašanje menadžmenta Rudnika Kreka, koji želi na sve načine da naplati što je moguće više i da s tim prekrije svoju poslovnu bilancu koja je izuzetno negativna koju čitamo u dnevnoj štampi. Znači, Grad Tuzla mora zauzeti jasan stav i odbraniti da RPC Lipnica postoji. Zašto? RPC Lipnica je za 20 godina ostvarila fantastične rezultate i imaju mogućnosti dalje da ostvaruju još bolje rezultate. Malo prije je Senad spomenuo da imamo euro fondove, to je osnovni problem vlasništva imovine i dokle god to ne pređe u vlasništvo Grada Tuzle, oni neće moći aplicirati bilo kakve ozbiljne povlaćenje sredstava. Imamo u izvještajima i o kojim je to iznosima riječ, koji su trenutno radili svaka čast, znači razmišljali, to je minimalno šta sve mogu, ali preduslov je da Grad Tuzla izvojuje bitku i da imamo to preduzeće koje će dalje nastavljati raditi, jer kad pogledamo da početnicima imaju nula kiriju, nula struju, nula internet i svašta nešto, jako puno i znači da se to svake godine diže po 25%, znači to je jako bitna stvar za ljude da krenu u razvijanje. I onda šta kaže Senad, otišli su, da, narasli su, treba im veći prostor, treba im bolji uslovi, znači, aplauz, ali Grad Tuzla mora krenuti u žestoku bitku da ovo spasi. Hvala.

## **ANA PEJIĆ**

U redu. Da li se još neko javlja za diskusiju vijećnika?

Zaključujem diskusiju vijećnika i stavljam na izjašnjavanje Izvještaj o radu i poslovanju Javnog preduzeća RPC Tuzla – Inkubator „Lipnica“ d.o.o. Tuzla za 2025. godinu i molim vas da se izjasnite.

Glasanje je okonćano.

Konstatujem da je proćitani izvještaj usvojen sa,

19 glasova za, nije bilo protiv i nije bilo suzdržanih.

Zamoliti ću...Slađana, jel imaju zaključci? Hoćete li na kraju sve zaključke za sva preduzeća il pojedinaćno? (Može). Može. U redu. Sljedeće:

## **JAVNO PREDUZEĆE JAVNO PREDUZEĆE RTV7 D.O.O. TUZLA.**

Otvaram raspravu klubova vijećnika.

Vijećnik Mirnes Ajanović. Izvolite.

## MIRNES AJANOVIĆ

Ovo je obiman izvještaj, nešto me posebno unutra malo potaklo, ali hajde kasnije ću, oko onih milionskih pregleda. Mada to nije čudo, ja imam na svojim stranicama po par miliona pregleda mjesečno. Al, oni su prije imali par stotine hiljada, a sad imaju, eto, milione. Pa malo bih više o tome kasnije. Dakle, nije nemoguće, gledajući moje, moj Facebook profil il stranicu, ja sam onda višestruko jači od njih. Al, et, hajde. Dakle, nije teško danas biti dostupan, samo treba imati malo volje, truda, energije, trošenja života, zdravlja, porodičnih okolnosti, svega i svačega, naravno, al može. Neki dan pustim objavu, čestristo hiljada ko od šale ode. Tako da znaju oni koji se busaju sa pregledima, od 10, 15, 20 pregleda, ili 10 lajkova, a misle da su moćni kao što imaju nekakva udruženja, nekakvih tam, ali nije ni važno, prepoznat će se, objave 10 lajkova. I oni nešto moćni. Predstavljaju državu, kažu čak. A ja objavim, u mene milion pregleda. Pa vidimo ko je jači. Oni imaju rakete, ja imam pračku, ali ova pračka izgleda jača od tih raketa. Moram ovo reći, jer ovdje se govori o medijima. Odnosno u ovom slučaju, našem mediju, nije državno, jest lokalno. A mi predstavljamo državu, dakle, gledajući opet imamo nekakvu vrstu državnog medija. Svidjelo mi se to kad sam vidio da ta ogromna cifra, pa čak, ono, ne mogu ni da vjerujem jel to tako, ne vjerujem da nije tačno. Podržavam. Ali evo izvještaj je sam dobar, stabilno je, rade, funkcionišu. Nije ovo obično preduzeće. Ni jedno nije obično, ali ovo je malo neobičnije, ipak je ovo ono koje prezentira sve ovo što se radi. I zavisnosti od toga kako se prezentira, ljudi to vide. Ako imate okolnost da državni medij zloupotrijebi svoj status, pogotovo ako je Mass media, ima veću dostupnost i o vama kaže bilo šta lažno, valja vama po godine il godinu dana hodat da dokažete da je to što je laž, laž, a onda i kad dokažete, zaboravilo se da ta laž bila laž. I što bi rekli, džaba vam. Kako kažu kupit ono perje sa nebodera koje se baci, al nekom nije džaba, neko neda. Neko neće pognut glavu, neko neće ni po koju cijenu dozvolit da kleveta ostane istina. Da, neko sam i ja. Ne postoji sila sa suprotne strane. Bez obzira ko bio sa te strane, planeta ako bi bila, a bila je. Kad je bila Korona, ja jedini prvi krenuo govorit da je to ubitačnost za ljude, da ne smije se ulaziti u to, da treba zaustaviti to. A mediji su hajcali da treba. A evo sad imamo iznadne smrti, svašta nešto. Imamo stanje gdje je neko tad nametnuo nama narativ da moramo da šutimo, ne smijemo da mislimo, ne smijemo da progovorimo, poturat rame kolko god hoće booster doza da udaraju. To su radili mediji. Ima li i jedan medij, nek neko progovori da je bio izuzetak? Nema. Niko! Svi, hajmo u rad. U šta? Možda u smrt. Kako god eksperimentalno je bilo. Eksperiment na nama. Nisu na miševima radili eksperiment, na nama radili. Treba kaže, moraš. A neko milijarde uzimao, stotine milijardi. Od tih stotina nek potroši jednu da kupi medije, dovoljno je, ne mora više. Ostalo sve ide njemu u džep. Zato govorimo o vrlo bitnom preduzeću. O nekome ko je dužan prezentirati istinu, a ne nasjesti na narativ kome interesno i politički odgovara u datom trenutku. Dakle, nije nimalo bezazleno biti medij, jer onaj koji govori istinu ne valja. Smeta svima. Sve će uraditi da ga ukloni. Dakle, građani moraju dobijati negdje putem nekoga. Ne može se baviti to federalna, državna il ko god već te informacije šta se radi na ovom Vijeću. Šta donosimo? Kakve odluke? U čijem interesu? Protiv čijeg interesa ili slično? Ima li onih koji rade protiv interesa građana za svoje lične interese? Ima li onih koji ne daju lift osobama sa invaliditetom, trudnicama ili slično u javnim ustanovama? A ima ih među nama takvih. Ne u Vijeću, nego u službama. Neću sad o Fahrudinu Deliću i Službi za prostorno uređenje. Neki drugi put ću. Ali, kažem, javnost mora znati o tome. Dakle, vidimo da su oni odradili veliki broj informativnih, obrazovnih, kulturnih, sporskih, dokumentovanih i dokumentarnih, kako god očete, programa. Radili su opet ono pozitivno. Mada, ja ovo ne mogu nikad gledat pozitivno. Šta pozitivno? Pozitivno da prezentiraju istinu, da građani dobiju informaciju koju trebaju dobiti, a mi iz Vijeća ako im treba dodatna sredstva, trebamo ta sredstva nadoknaditi. A ne da medij se mora prodati nekome, tajkunu ili bilo kome, da bi mogao da pozitivno posluje, a onda informacija o istini stavlja po strani. Nebitna je istina, bitno

je da mi pozitivno poslušamo. Mi ovdje moramo tim ljudima obezbijedit platu da ne moraju tražiti ni od koga sa strane bilo šta. I to dobro platu. Ne kao nekim sudijama što su dali dobru, da ne bi, kaže, radili su, sudili pogrešno, pa evo još gore se pohasili. Al ovdje mislim da se radi o ljudima koji su s nama, evo znam, otkad sam u Vijeću, isti su ljudi i na RTV7 i TV Tuzla kad je bila tad. Tu su, rade, grade, drže, očuvaju, bore se, preživljavaju. I stalno se o nekakvom tom preživljavanjem priča. I jedan od prijedloga treba biti, a vidjet ću zaključke sad, dok recimo prođem još malo dijelom ovaj što treba govoriti. Imaju i oni izazove sa kojima se suočavaju. Mali je broj zaposlenih, nisu baš ni adekvatno plaćeni, naravno. Imaju spektar televizijski, radio, program, portal, društvene mreže. Svega danas ima. Danas je da čekaju na društvenim mrežama da nekoga napadnu. Danas jedino prolazi crna hronika i vijesti iz crne hronike, one najgore. Što god uradite dobro, niko ne gleda. Ovo kako je postalo po društvenim mrežama, koliki je bijes, mržnja, psovanje, najgore moguće psovke koje mogu postojati, to je danas postalo javno ne društvenim mrežama. Ovo izgleda se pokazuje da najveća korist ovih društvenih mreža, uslovno rečeno pod navodnicima, korist jeste da onaj bijes koji je bio prije u nekoj ulici il nekakvom sokaku poznat kao Bože sačuvaj, danas ima mogućnost da taj takav bude poznat cijelom svijetu. I da svi znaju za njega. Što bi rekli malo, ono, proširilo se taj sokak, nije više sokak, već et. I sad imamo, razmišljao sam više puta, odkud ta tolika mržnja, bijes i sve koja dominira u stvari, nismo se mi promijenili, nego su samo društvene mreže nas razotkrile, raskrinkale. Nažalost, kome god se sviđa nek uzme kako hoće, ono što smatram, trebam da kažem ja i kažem, ukazujem. Dakle, i oni se susreću sa tim, sutra neko će reć, ma kakva ova RTV7, ovo ono.

Ovdje nisam dobio odgovor šta je sa našom inicijativom, pa evo zamolit ću sekretara da to evidentira, gdje smo mi predložili da se ide ka realizaciji, ako smo dobili, recite, definisanja umjesto RTV7, kao što većina i gotovo sve opštne, gradovi, država, federacija, imaju nazive po tome. Mi ovdje imamo nešto što nikakve veze nema s Tuzlom. RTV7 ne znači jest jednako Tuzla, osim za onog ko zna, a u marketingu to je minus. Kao kad bi vi, ne znam kakav čips, prodavali pod nešto deseto. Ko će sad skontat da je to čips? Eto nešto zapakovano u nešto. Dakle i ta okolnost, još uvijek nemamo informaciju šta je sa zaključcima Vijeća koji su bili odnosili se na okolnost, da ovaj naziv se promijeni u prepoznatljiv naziv, kao što je bio Radio Tuzla, TV Tuzla il nešto slično. (ANA PEJIĆ – Molim vas, samo vodite računa o vremenu). Siguran sam da bi bilo mnogo više efekta i u marketingu i u svemu onome što znači život jednog ovakvog medija, pa kad završe ostali vijećnici, ja ću se, odnosno klubovi, javit kao vijećnik. Hvala.

## **ANA PEJIĆ**

U redu. Da li se još neko javlja ispred klubova vijećnika?. Vijećnik Nedžad Jusić. Izvolite.

## **NEDŽAD JUSIĆ**

Jel može samo...Evo ga, ok. Nešto neda da progovori. Ništa, ja ću pokušat bit što kraći vezano za pomenuti Izveštaj o radu i poslovanju Javnog preduzeća Radio-televizije 7 d.o.o. Tuzla. Samo moram istaći pohvalu i zahvalnost svim zaposlenim u ovom javnom preduzeću. Ja, kao prvenstveno kao građanin grada Tuzle i kao aktivista u nevladinom sektoru, izuzetno smo zadovoljni sa radom. Imamo pristup javnom servisu kako bi mogli iznijeti i pohvale i sugestije i na bilo koji drugi način da javnost bude upoznata sa događajima i aktivnostima koji radi udruženje, gdje sam ja takođe aktivan, kao i druga udruženja nacionalnih manjina prvenstveno, a i druga udruženja, vidimo evo u izvještaju da su imala dosta gostovanja, da su praćene aktivnosti. Samo moja jedna preporuka menadžmentu da

nastavi sa ovakvom praksom, jer jednostavno svi građani grada Tuzle imaju pravo da budu dio javnog servisa, odnosno naše televizije i siguran sam u tome da će se to ispoštovati u narednom periodu. Hvala. (MIRNES AJANOVIĆ – Jedna replika).

**ANA PEJIĆ**

Može replika. Vijećnik Mirnes Ajanović. Izvolite.

**MIRNES AJANOVIĆ**

Ma nije, replika je u okviru ovoga što smo, dok sam govorio, pa sam dobio informacije evo iz RTV7 i par kolega, ja kada sam govorio o ovom nazivu RTV7, oni jesu dodali Tuzla iza, ali bez obzira, sad to kako ko, ja da mogu, ja ga nikako ne bi zvao RTV7. To mora biti decidno TV Tuzla, Televizija Tuzla, Tuzlanska televizija, bez tih RTV7. Samo da ne bude zabune. Dakle, stoji danas, stavljeno je nakon naše inicijative da stoji Tuzla. Al još uvijek predlažem analizu, mogućnost da idemo ka izbacivanju toga, ka samom definisanju da tome bude nekakva, evo iz ovih nekoliko prijedloga, mogućnost naziva, bez komplikovanja, RTV7 Tuzla još uvijek je nešto što, jel to ukazuje da je to Radio Tuzla? Jel to ukazuje da je Tuzlanska televizija? Može biti nešto sluč...otkud znamo šta.

**ANA PEJIĆ**

U redu. (MIRNES AJANOVIĆ – Hvala). U redu. Replika. Vijećnik Mensur Alić. Izvolite Mensure.

**MENSUR ALIĆ – zamjenik predsjedavajućeg  
Gradskog vijeća Tuzla,  
vijećnik Tuzlanske alternative**

Ja bih samo Mirnese, ovaj, moramo dobro razmisliti o tome da li je bila likvidacija RTV Tuzle, pa ne može ponovo dobiti to ime, to zakonski, ja mislim da tu postoji neki problem. Jer ono što je bilo prije, ono je sudski i poravnano. E zbog toga možda tu direktor da obrati pažnju na to ako može da izvrši promjenu, to bi dobro bilo.

**ANA PEJIĆ**

U redu. Ispravka krivog navoda. Mirnes Ajanović. Izvolite.

**MIRNES AJANOVIĆ**

Da se ne shvati da ja govorim u negativnom smislu. Ovo je i dalje prijedlog. Dakle, prijedlog, znam da je bila Televizija Tuzla, ali ne znam da li su oni prije tog Televizija Tuzla nosili još nekakve druge odrednice, Tuzlanska televizija ili nešto slično, pa da ne može. Ali možda i ovo preporuka da ostavimo ovaj jedan prijedlog, pa neka Slađa stavi još dodatno jedan, evo i Mensurov i moj i ostali, da se ide i dalje u razmatranju mogućnosti definisanja te televizije pod punim nazivom Radio Televizija Tuzla. Možda taj naziv nije postojao. Onda već imamo dakle direktan naziv koji bi mogao proći. Ne insistiram. Ako neko smatra da treba da ostane RTV7, radi prepoznatljivost, nek ostane. Ja da imam vlasti i mogućnosti, ja bih to nazvao danas Radio Televizija Tuzla. I to je to. Ali evo, jedan od prijedloga. Ništa u smislu negativnog. Ne želim vršiti pritisak na bilo koga. Hvala.

**ANA PEJIĆ**

U redu. Replika. Vijećnica Svjetlana Kakeš. Izvolite.

**SVJETLANA KAKEŠ**

Ma zapravo i nije replika, nego malo samo pojašnjenje. Mislila sam da se ne javljam, al kako je zamjenik predsjedavajuće Mensur Alić pomenuo, pričao o razlozima. Evo, podsjećam da u ovom izvještaju na strani 24 je objašnjeno i ovo što ovaj kolega Mirnes govori o ovom prelaznom rješenju koje su uradili u RTV7 postupajući po zaključku sa prethodne rasprave o RTV7, al je pojašnjeno da je jedan od glavnih razloga što RTV7 ima dozvolu RAK-a, Regulatorne agencije do 2031. i da je zaista komplikovano sad u međuvremenu mijenjat dozvolu, tražit bilo kakve izmjene, jer je to jako zahtjevan proces. Tako da ima objašnjenje na strani 24, što ne namjeravam uopšte uticat na prijedlog zaključka koji je Mirnes dao, jer i dalje može stajat zaključak ovako što se mene tiče.

**ANA PEJIĆ**

U redu. Sljedeća diskusija. Vijećnik Senad Mehmedinović. Izvolite Senade.

**SENAD MEHMEDINOVIĆ**

Bez obzira što je RTV7, mislim da svi opet govore Radio Televizija Tuzla. U nazivu je samo RTV7. Ja bih isto lično volio da se naziva Radio Televizija Tuzla. Naročito kad se ode na web stranicu pa piše sedmica, ja mislim da je to bingo. Više me asocira na neku lutriju. Al nema veze. Radio Televizija 7 radi dobar posao. Predlažem im samo da u narednom periodu, odgovorili su mi na prijedlog zaključka koji smo mi dostavili, da sadržaje na portalu koje imaju, na web stranici, da bude digitalno pristupačan za osobe s invaliditetom. Još nisu pristupili tom poslu. I vjerujem da će u toku godine ovo uraditi. Zašto? Zato što veliki broj osoba s invaliditetom, a udio osoba s invaliditetom u populaciji je 15% u odnosu na broj stanovnika. Pa sad možete da pretpostavite u gradu Tuzli koliki je procenat, odnosno, broj osoba s invaliditetom, koji bi možda isto željeli da pročitaju neke informacije, da dođu do nekih informacija. Možda isto tako ne bi bilo loše da u sklopu vlastite produkcije, a vidimo da RTV7 ima veliki broj svojih emisija, što je stvarno pohvalno, da možda da razmišljaju, evo kad je onaj dnevnik, jel kako se zove, Aktuelno, da bude isto tumač znakovnog jezika. I bilo bi dobro kada evo neka od emisija, mi imamo ovde Centar za vaspitanje, obrazovanje slušno oštećene djece, da se pozove tumač znakovnog jezika i da bar kada je neka emisija informativnog karaktera, da bude tu tumač kako bi osobe sa oštećenjem sluha mogli da dobiju određene informacija koji se tiču lokalne zajednice. To su prijedlozi onako, pa evo nek menadžment malo razmisli o tim stvarima, mislim da je dobro.

Generalno što tiče RTV7, mislim da mi svi koji se krećemo po našem gradu, ja gdje god odem, bilo kakva da je manifestacija, da li sportska, da li kulturna, a lokalna je tema, uvijek je prisutna RTV7. Jel to knjiga, jel to manifestacija, da ne govorim evo sjednice Gradskog vijeća, zaista su ažurni u svom poslu i tu im skidam kapu. Volio bi lično, ukoliko postoji mogućnost, dakle ništa nije prijedlog zaključaka, ovi ljudi zaslužuju veće plate, ovi ljudi su prisutni na terenu, radno vrijeme je njihovo tako kako jest, kad je manifestacija neka poslije podne, oni su isto prisutni, ovdje prate naš rad i zaista ukoliko postoji mogućnost nekad da se pronađe model kako da dođe do povećanja plata zaposlenih, ja, dakle i mi kao Klub ćemo podržati sa obje ruke i naravno ako možemo da učestvujemo sa nekim prijedlozima, pa evo, možda i na prijedlogu Budžeta, ukoliko, iako Grad Tuzla već izdvaja nekih 750-800 hiljada

Konvertibilnih maraka, da se ta sredstva malo još više izdvoje, povećaju, kako bi se i povećale plate, inflacija nas sve guši. Plate koje su ostale na nivou od prije par godina, zaista je teško izaći na kraj sa tim primanjima i mislim da trebamo pristupiti rješavanju, odnosno povećanju plata zaposlenika RTV7.

Najveći uspjeh, mislim da je to što ima 30 hiljada pratilaca, rast, kako navode, sa oko 700 hiljada pregleda. I vjerovatno među tim pregledima imamo i osoba s invaliditetom koji žele nešto da dobije informacije i zato smatram da je zaista ta digitalna pristupačnost, dakle nije bitna samo fizička pristupačnost i digitalna je veoma bitna u smislu ostvarivanja prava populacije osoba sa invaliditetom. Veliki broj imaju emisija, imaju razvijenu vlastitu produkciju, što je to naravno dobro.

Positivan finansijski rezultat, iako je to oko 15 hiljada Konvertibilnih maraka, bolje je u svakom slučaju plus nego minus i evo od ovih 15 hiljada i 600, mali procenat se izdvoji i onda se uradi digitalna pristupačnost web stranice i stvarno će se pokazati ono što jesu jedno odgovorno preduzeće, ustanova. Izvještaj je generalno deskriptivan i možda prijedlog za ubuduće kad se rade ovi deskriptivni opisni pokazatelji, da u izvještaju bude poređenje sa nekim televizijama, mislim ne može se sad poredi s nekim televizijama koje su kantonalnog nivoa, al bar onako malo komparacije ubaciti da se to vidi na način kakva je gledanost televizije, to je isto jedan ljep, ljep podatak. U izvještaju stoji da je nedovoljno ulaganje u tehniku zastarjela analogna oprema, potreba za digitalizacijom i za većim ulaganjima. Marketing interesantno da između 2024. i 2025. godine, čak i u 2025. godini blago su pala ova sredstva, tako da iznosi otprilike oko 211.000 i to je doprinos njihov, a ono resto od 800.000 je Grad Tuzla. Bilo bi dobro nekako raditi na popularizaciji RTV7 da imaju što više vlastitih prihoda kroz različiti marketing. Dakle, izvještaj jest deskriptivan, iako nedostaju određeni pokazatelji, na primjer uspješnosti gledanosti televizije, mislim da se treba podržati zbog toga što je zaista RTV7 prisutna, prati, radi i naravno izvještava nas.

Prijedlog zaključka jedan koji ću dostavit, jeste da Gradsko vijeće Tuzla zadužuje upravu Javnog preduzeća RTV 7 da, u saradnji sa nadležnim službama Grada Tuzle i Agencijom „TRAG“, aktivnije prati i aplicira na javne pozive domaćih i međunarodnih donatora, fondova Evropske unije i drugih finansijskih mehanizama radi obezbjeđenja sredstava za digitalizaciju, modernizaciju tehničke opreme i razvoj novih medijskih platformi. Hvala.

## **ANA PEJIĆ**

U redu. Da li se još neko javlja ispred klubova vijećnika?

Zaključujem diskusiju klubova vijećnika.

Otvaram diskusiju vijećnika.

Vijećnik Mirnes Ajanović. Izvolite.

## **MIRNES AJANOVIĆ**

Hvala. Gdje sam stao u smislu izazova sa kojima se susreće ova kuća u konkurenciji sa svim medijima, evo danas otvorite jednu bilo koju platformu po dvjesto programa, valja to šta gledat, koji ćeš odlučit se da gledaš, društvene mreže. Dakle, jesu izazovi, valja napraviti sve ovo što treba i ja još jednom, evo, želim izraziti zahvalnost i vjerovatno i u ime javno Vijeća i u svoje svakako, priznanje svemu ovome što rade, dakle, ti novinari, urednici, tehničari, snimatelji, drugi radnici koji svakodnevno su u realizaciji ovog što oni rade, pa posebno zbog ovog povećanja gledanosti koju su naveli, jer mi svi moramo prije svega biti u službi građana, dakle, i mi kao Vijeće i oni kao reprezent onoga što mi radimo, jer ako to ne dođe do javnosti, ako to ostane sve ovo u ovih nekoliko zidova, šta smo mi onda uradili? Mi smo imali

nekakvu sjednicu Vijeća, gdje smo mi nešto kao raspravljali, nešto kao radili, da bi nas onda neki, ako nema te informacije, mogli napadat da to ništa ne rade, sjede, a mi danas znamo napraviti po, recimo onome što su zadužene neke službe, kao što recimo Služba za prostorno, pa, ja ne znam jesmo mi, 50, 70 prijedloga je bilo, ili slične takve okolnosti gdje mi radimo ono što drugi treba da rade, gdje mi u stvari to i ne bi trebali, jer očito da ovi neće, ne znaju il šta god, a mi onda odradimo, al to mora dođe do javnosti. Treba, dakle, još malo tih poboljšat sadržaja, dokumentarnih emisija koje promovišu Tuzlu, istoriju, kulturu, pa i one tuzlake koji su uspješni, govoriti, dakle, o onome što jeste bitno za građane, a po meni je istina najbitnija koja je uvijek najproblematičnija, ali otom potom.

Prijedlog zakučaka. Dakle, može biti, ja ću ovo dostaviti, već je napisano, pa ću dostaviti, ne mora pratit se.

Gradsko vijeće usvaja Izvještaj o radu i poslovanju RTV d.o.o. Tuzla, nisam rekao 7, al et za 2025-u.

Gradsko vijeće konstatuje da je JP RTV 7 d.o.o. Tuzla ostvarilo pozitivan finansijski rezultat i realizovalo značajne programske aktivnosti od javnog interesa za građane Tuzle.

Gradsko vijeće daje podršku daljem razvoju lokalnog javnog medijskog servisa kroz unapređenje programskih sadržaja, digitalnih platformi, tehničkih kapaciteta i vlastite produkcije.

Gradsko vijeće Tuzla smatra da RTV 7 i u narednom periodu treba nastaviti jačati profesionalne standarde, objektivno informisanje građana, pluralizam mišljenja i ravnopravan pristup svim društvenim subjektima.

Gradsko vijeće Tuzla zadužuje Upravu RTV 7 da u narednom izvještajnom periodu dodatno prezentira pokazatelje gledanosti, slušanosti, digitalnog dosega i strukture prihoda, kako bi se mogla izvršiti još potpunija analiza efekata rada.

Gradsko vijeće Tuzla izražava zahvalnost zaposlenicima JP RTV 7 Tuzla na doprinosu informisanju građana i realizaciji programskih sadržaja od javnog interesa za grad Tuzlu, te smatra da njihov profesionalan i odgovoran rad treba biti adekvatno vrednovan kroz unapređenje uslova rada, ali i povećanja plata i drugih primanja zaposlenih.

Gradsko vijeće Tuzla smatra da je potrebno i dalje razmotriti mogućnost promjene ili dopune naziva JP RTV 7 d.o.o. Tuzla na način da jasnije sadrži odrednicu Tuzla, bez RTV 7, kao npr. RTV Tuzla, radi jačanja lokalnog identiteta, prepoznatljivosti medija, promocije Grada Tuzla i unapređenja tržišne pozicije Društva, ipak se radi u Društvu, na regionalnom medijskom prostoru. Toliko. Hvala.

**ANA PEJIĆ**

U redu. Sljedeća diskusija. Vijećnik Samir Mulaosmanović. Izvolite.

**SAMIR MULAOSMANOVIĆ**

Hvala. Mao kratko ću samo da se ne zamaram ovim tabelama i svim. Podrška direktoru i menadžmentu. Da naglasim RTV 7. je lokalna televizija i bavi se lokalnim stvarima. Nije ejdž bi o, znači, bukvalno bavi se lokalnim stvarima i po meni to rade fantastično. Razlog zašto? S onim što imaju i šćim raspoložu. Dao Bog da je oprema bolja, vjerovatno bi sve i bolje funkcionisalo, tako da, što bi rekli koliko para, tolko i muzike, ali s ovim što oni imaju, u kakvim uslovima rade, znači, po meni, jako zadovoljavajuće. Što kaže Senad, uvijek treba misliti na plate, to je početak nekakve motivacije da bi ljudi radili još bolje svoj poso, tako da podrška i tom, ukoliko bude i zaključak u tom pravcu išo, ali definitivno uvijek ću biti za povećanje plata tamo gdje se nešto radi. Ukratko, čestitke i samo nastavite raditi da bude što bolje. Hvala.

## ANA PEJIĆ

U redu. Zaključujem diskusiju vijećnika i stavljam na izjašnjavanje Izvještaj o radu i poslovanju Javnog preduzeća RTV7 d.o.o. Tuzla i molim vas da se izjasnite.

Samo malo. Imamo problem. Ovdje vijećnik Šefik Husić nije u sali, a za njega je neko glasao.

Molim vas da poništite Enisa. Hajde molim samo malo koncentracije. Molim vas da se ponovo izjasnite.

Glasanje je okončano. U stvari, moramo ponovit. Mirza Malkočević, vijećnik, nije se izjasnio. Molim vas, da se samo malo skoncentrišete. Znam da je vruće i da je pala koncentracija, al...Molim vas ponovo da se izjasnite.

Glasanje je okončano.

Konstatujem da je Izvještaj o radu i poslovanju Javnog preduzeća RTV7 d.o.o. Tuzla usvojen sa,

20 glasova za, nije bilo protiv i 2 suzdržana.

Prelazimo na sljedeći Izvještaj o radu i poslovanju:

## JAVNO PREDUZEĆE „GRADSKA VETERINARSKA STANICA“ D.O.O. TUZLA.

Otvaram raspravu klubova vijećnika. Vijećnik Mirnes Ajanović. Izvolite.

## MIRNES AJANOVIĆ

Eh, ovde ja nemam potrebe za kritička razmatranja. Aj što me gleda Dragana, vidi kako to ona...Pa još ha, ha, ha. Nemam, vala baš. Neki dan sam takođe bio kod njih, razgovarao sam i sa direktorom Ferizbegovićem. Funkcioniše savršeno, način, prijem, sve i hajde nek mi neko kaže da igdje postoji osoba koja na način kako to on predstavlja tu ustanovu, može to predstaviti. Od komunikacije do prijema, do rasprave, do znanja, do načina kako to reći, a da mi to razumijemo. Mensur i ja se sjećamo davno, nekad davno, davno, kad smo mi bilo malo mlađi. Ja, kad doktor Ferizbegović dođe na Vijeće, pa onda one prve informacije o Brucelozi, pa kako to ide, pa kroz zemlju, pa koliko tu duboko, pa koliko daleko, pa...Al sve je to prezentirano od strane osobe koja je maksimalno stručna, čak i on na nivou federacije, jedan od glavnih, regije i dalje svijeta. Evo neki dan su bili i dobio sam informaciju na Svjetska zdravstvena organizacija, nešto ja njih plaho ne volim, ali i dotle je došao. Dakle, al čovjek koji ima savršeno znanje, to znanje zna prezentirat onima koji ne imaju to znanje i ne možemo svi biti iz jedne oblasti pametni, ili neko ni iz kakve. Svakakvih nas ima, naravno. Al on to zna uradit. Dakle, imamo stručno, profesionalno, odgovorno, savjesno obavljanje dužnosti. Ne govorim ništa o godinama. Iskustvo čini svoje pogotovo. I pravo na zaštitu prava i mladih i onih starijih, ali i nama pravo gdje okolnost, pogotovo menadžmenta, nije radni odnos, nije to status taj koji jeste, ovdje se bira čovjek koji zna. Imamo dosta situacija gdje negdje ostajemo bez ljudi koji su gradili, radili, ulagali sebe u nešto i onda ih mi šutnemo, jer kažu ti sad imaš toliko godina, a on kapacitet ima višestruko jače nego bilo ko i koji može još stotine i stotine obrazovati da budu kao on. Al mi kažemo, ti sad moraš bit mrtav bukvalno, politički i društveno svakako. Živ, al ne smiješ se javljat. Nisam za to. Niti da mladog nekog odstranimo ako vidimo da zna, da ide, da umije. A niti da favorizujemo ako vidiš da ne zna, ubiće nas. Ne možeš mu dati da vozi avion, a ne zna auto vozit. Nosi još uvijek ono P. Govorim iz iskustva. Imam dozvole od auta do aviona i između sve one. Tako da znam i kroz to šta je. Dakle, ovdje imamo vrlo bitnu Veterinarsku stanicu, a moram vam ispričat.

Imam macu kod kuće. Kupila supruga, ja protiv, šta ću, moro, predo se. Ja, šta ćeš? I čudo jedno, to je sad član porodice. A bio protiv, što će mi obaveza? Gdje ćeš macu bolan, moraš, gdje ćeš na odmor, vam moraš kontakt šta ćeš s njom. I džaba meni doneseno u kuću i valja ti prihvatit. I bi supruzi nešto kaže hajde da ne idemo dol na Šićki daleko. Ode ona negdje blizu. Da joj da protiv parazita. Za malo umrla. Za sat vremena maca je hodala ko mrtva. Bukvalno panika. Bio sam na Kolegiju kad me zvala supruga, ovo zadnje koje smo imali. Trči kući šta je? Vidim gotovo. Dole, terapije tri injekcije. Svašta nešto se dodalo. Preživi maca. E neš reko nikad više otić, nek samo dole. Da te vidim još jedanput. Člana porodice je ugrozila, ona jedna, panika bila. Govorim samo o tome koliko je to bitno. Te životnje su član porodice od one koze i krave ne znam čega šta, pogotovo ove kućne. To je u kući, to je s nama stalno. Nemaš šta, neko više, neko ovakve, neke onakve, et kod mene maca. I hvala toj Veterinarskoj stanici da ne bi nje tad ovog zadnjeg Kolegija kad smo imali, osto bi ja bez te mace. Zamislite u kući te panike, stradanja i svega tog ko da je čovjek umro. Ne daj Bože. Zato govorim o vrlo bitnom dakle ovom njihovom angažmanu. Hajde da ne govorimo o borbi protiv zaraznih bolesti, širenje Zoonoza, tad Bruceloze, tad davanja stručnih savjeta kako da se zaštitimo, dezinfekcije, deratizacije, dezinsekcije ili neubijanja pasa lualica. Kolko god bio problem imat te pse na ulici, još veći je problem kad su ih ubijali. Vrište životinje, jadne ciče dok ne izdahnu, a ganjaju ih puškom po Tuzli. I to je bio šinter, znamo, neću ga ni zvat kako je. Oni sad to udome i idu negdje u Evropsku Uniju. Kako uspiju, ja stvarno, oduševljenje, čovjek bi rekao, jeste ali to radi. Ne ubijaju ih. Zamisli da neko ubije psa na ulici. Strašno. Živo je to. Kako gledam, kad idem cestom, ako vidim ravan, pa nekad izvrnem nogu, reće neko, eno ga pobudalio. Al gledam, obidi ga, ako ne mogu. Mislim, šta ću, ako ne možeš gledat stalno. Al ne možeš ubit nekog. Gdje ćeš nekog ubit? Svega ima. Kako god, ja ovakav kakav sam nemam milosti prema onim ljudima koji su loši i zaista nemam milosti. Ja sam siguran da ne postoji brutalnija osoba od mene kad se treba suprostavit prema zlim i monstrumima. A ovamo s druge strane na korektnost, na život ću reagovat, da ću svim silama branit i tuđi, a i svoj. Tako da znaju. A znam.

Evo dakle, imamo te rezultate. Ovdje nije rezultat tog jednog čovjeka, Jasmina Ferizbegovića. Jest, nosi to duži niz godina, prenio je na sebe, ali uspio napraviti kolektiv. I vama je dole isto, bilo doktora ne bilo, dole su svi isti. U toj Veterinarskoj stanici. Postupa se po pravilima, odnos prema svima, prijem, znanje je preneseno. To je najvažnije. To je suština, neki ga čuvaju, neće da daju. Isto ko da nešto, ko da će mu oduzet dio tijela, organizma, nečega. A ovdje nije. Znanje se prenosi da iza ostane. Da bude korisno svima nama. Od veterinara, veterinarskih tehničara, drugih zaposlenika, svakodnevno obavljaju sve što treba na terenu. Imaju tamo i rengene i hitnu pomoć imaju, sve imaju. Ono što treba za zaštitu.

Nisam jednom, macu sam isto jednu našao na cesti, odnio, slomljena joj bila noga, šta oporavali je. Pticu, goluba odneseš, šta ćeš? Šta ću gledat u njega. Ne mogu proć pored njega, jadan stoji, ja da prođem, gledam, odoh ja svojim poslom. Spakujem u auto il dovezem, il kažem tu sam i oni odmah dođu. I to rade. Ja, et, vidi mogu bit i takav. Tako da, treba to reći, tadi toga što treba da znamo šta u Tuzli imamo. I kakvu Veterinarsku stanicu imamo. I da se čuvamo onih drugih. Evo, sad je nama to. Rekao sam, više nikad, nigdje, ni po kakvu cijenu. Ako me nema, uzmi taksi, idi. Ima se, zna gdje je Veterinarska stanica, sve ostalo, nek gradi kvalitet. Ja ovdje sam samo izgubio tu macu i svašta nešto, radi bezvezne stvari. Potpuno bezvezne, čuj nešto protiv parazita, al izgleda predozirano bilo. Gledao sam kasnije, evo ovdje imam sliku, umrljan datum na tom što je dato. Zamislite ubio mačku bolan. (ANA PEJIĆ - Molim vas, vodite računa o vremenu samo). Vodim. Hvala. Hoću zaključke sad, nema ih puno, pet (ANA PEJIĆ – Može. Izvolite). Ne bih, dakle, više da ne trošim vrijeme. Usvajamo izvještaj prvi.

Konstatujemo da je, naravno, i u 25. godini ostvarila zapažen rezultat o izražavanju poslova od javnog interesa iz oblasti veterinarske djelatnosti, veterinarskog javnog zdravstva i zaštita i zdravlja građana.

Gradsko vijeće izražava priznanje doktoru, odnosno, direktoru prof. dr. Jasminu Ferizbegoviću, Upravi Društva, Nadzornom odboru, Odboru za reviziju i svim zaposlenicima JP Gradska veterinarska stanica d.o.o. Tuzla za profesionalan, odgovoran i uspješan rad ostvaren tokom 2025. godine.

Gradsko vijeće Tuzla smatra da Grad Tuzla i u narednom periodu treba nastaviti pružati podršku razvoju kapaciteta Gradska veterinarska stanica d.o.o. Tuzla, imajući u vidu njen značaj za zaštitu zdravlja ljudi, okoliša, životinja.

Gradsko vijeće Tuzla smatra da ostvareni rezultati predstavljaju osnov da se kroz buduće planske i budžetske aktivnosti nastavi valorizacija rada zaposlenika JP Gradska veterinarska stanica d.o.o. Tuzla, uključujući unapređenje uslova rada i materijalnog položaja zaposlenih adekvatnim povećanjem plata. Toliko. Hvala.

### **ANA PEJIĆ**

U redu. Sljedeća diskusija. Vijećnica Dragana Berberović. Izvolite.

### **DRAGANA BERBEROVIĆ GAGRO**

Hvala predsjedavajuća. Hvala i kolegi što me ovako spomenuo. Ono što me raduje u ovom izvještaju da vidim, kaže, pored direktora, profesora, doktora, ima doktor veterinarskih nauka, pa kaže magistar, doktor. Znači, ja ovdje vidim dva potencijalna mlada kadra koja očekujem u narednom periodu (ANAP EJIĆ - Molim vas, samo za malo tišine) da su usvojili znanja dovoljno i ovaj, da će moći da dobiju priliku i šansu. Osim toga, ne znam, imala bi biti pitanje za direktora Veterinarske stanice, ako mogu? (ANA PEJIĆ - Može, izvolite). Evo ovako. Ja ću da pročitam. (vijećnik Mirnes Ajanović govori bez uključenog mikrofona op.a.). Hvala kolega, al, ja ne imam sponzora, pa mogu da postavim pitanje i malo nezgodno.

Da li je Veterinarska stanica Tuzla ostvarivala ili trenutno ostvaruje poslovnu suradnju sa Bosna - Vet d.o.o. Zenica direktno ili posredno putem trećih pravnih ili fizičkih lica ili institucija? Ukoliko jeste, molim da navede osnov saradnje, period u kojem je ista realizovana, kao i ukupnu vrijednost zaključenih ugovora i izvršenih poslova? Hvala.

### **ANA PEJIĆ**

U redu. Zaključujem diskusiju klubova vijećnika.

Otvaram diskusiju vijećnika.

Vijećnik Samir Mulaosmanović. Izvolite.

### **SAMIR MULAOSMANOVIĆ**

Kratko ću ja, pošto sam i na prošlom izvještaju je direktor iznio s čim se bori Veterinarski zavod i to je sve ostalo isto, znači ista borba, ista meta, a znamo kako je teško u konkurenciji raditi, ali u ovom slučaju javljam se kao korisnik Veterinarskog zavoda, gdje sam radio, uglavnom kao korisnik njihovih usluga, izuzetno sam zadovoljan i nikakve razlike nema između privatnih ustanova u kojima sam prije obavljao poslove koje su oni preuzeli, tako da potpuna podrška izvještaju i njihovom načinu rada. Hvala.

**ANA PEJIĆ**

U redu. Da li se još neko javlja za diskusiju od vijećnika?

Prije nego što zaključimo diskusiju vijećnika, zamolit ću direktora Javnog preduzeća Gradska veterinarska stanica d.o.o. Tuzla da odgovori na pitanje vijećnice Dragane Berberović. Izvolite. (JASMIN FERIZBEGOVIĆ – Je li trebam izać?). Može za govornicu, svakako morate zbog stenograma. Molim vas, samo kratko na pitanje vijećnice Dragane da odgovorite.

**JASMIN FERIZBEGOVIĆ – direktor Javnog preduzeća  
„Gradska veterinarska stanica“ d.o.o. Tuzla**

Poštovana predsjedavajuća, gospodine dopredsjedavajući, gospođu Krajina, uvaženi vijećnici Gradskog vijeća, vrlo kratak odgovor.

Znači, Bosna – Vet Zenica koju gospođa pominje je vodeća veledrogerija u Bosni i Hercegovini kad se tiče veterinarske medicine. Javno preduzeće Gradska veterinarska stanica Tuzla kao najveća veterinarska organizacija u Tuzlanskom kantonu i organizaciono prva Veterinarska stanica u Bosni i Hercegovini, u odnosu na druge veledrogerije, najmanje obim posla radi sa Bosna - Vetom Zenica. A naravno, pošto vam ne znam napamet cifru, to vam možemo pismeno dostavit. Dakle, najmanje radimo u odnosu na druge stanice koje su minorne u odnosu na nas. Hvala ljepo.

**ANA PEJIĆ**

U redu. Zahvaljujem se. Zaključujem diskusiju vijećnika i stavljam na izjašnjavanje Izvještaj o radu i poslovanju Javnog preduzeća Gradska veterinarska stanica d.o.o. Tuzla i molim vas da se izjasnite.

Glasanje je okončano.

Konstatujem da je pročitani izvještaj usvojen sa,

19 glasova za, nije bilo protiv i 4 suzdržana.

Zamolit ću sekretara da pročita zaključke koji su proistekli iz diskusija.

Da li ste za da glasamo zajedno ili pojedinačno o zaključcima? (Zajedno). Zajedno. U redu. Izvolite Slađana. Pojedinačno. Izjašnjavat ćemo se pojedinačno o zaključcima. Izvolite Slađana.

**SLAĐANA KRAJINA – sekretar Gradskog vijeća Tuzla**

Prijedlog prvog zaključka:

1. Imajući u vidu Izjašnjenje Premijera Federacije Bosne i Hercegovine, broj 562/2026, od 09.04.2026. godine, kojim se Vlada Federacije Bosne i Hercegovine izjasnila da ne prihvata inicijativu koju je podnijelo Gradsko vijeće Tuzla, putem Zastupničkog doma Parlamenta Federacije Bosne i Hercegovine, kojom se tražilo da se u okviru izmjena Zakona o rudarstvu Federacije Bosne i Hercegovine ili posebnim zakonom riješi pitanje statusa napuštenih nekretnina i rudarske infrastrukture po okončanju eksploatacije rude i da se takve nekretnine prenesu u trajnu svojinu lokalnih zajednica na čijem području se takve nekretnine nalaze, u svrhu organizovanja privredne aktivnosti koja će omogućiti nova upošljavanja, te da prioritet bude prenos svojine napuštenog Rudnika Lipnica, u svrhu poslovanja i razvoja RPC Tuzla - Inkubator „Lipnica“, Gradsko vijeće preporučuje gradonačelniku i nadležnim gradskim službama da u ime Grada Tuzle, a nakon sagledavanja svih imovinsko-pravnih pitanja, stupe u

komunikaciju sa Vladom Federacije Bosne i Hercegovine u cilju iznalaženja najboljeg, na zakonu zasnovanog, rješenja kojim bi se regulisao prenos svojine napuštenog Rudnika Lipnica na Grad Tuzlu, a u svrhu nastavka poslovanja i razvoja RPC Tuzla - Inkubator „Lipnica“.

**ANA PEJIĆ**

Molim vas da se izjasnite o pročitanoj zaključku.  
Glasanje je okončano.  
Konstatujem da je pročitani zaključak usvojen sa,  
19 glasova za, nije bilo protiv i 3 suzdržana.

Možete dalje Slađana.

**SLAĐANA KRAJINA – sekretar Gradskog vijeća Tuzla**

Prijedlog drugog zaključka:

2. Gradsko vijeće Tuzla zadužuje upravu JP RTV 7 d.o.o. Tuzla da, u saradnji sa nadležnim službama Grada Tuzle i Agencijom „TRAG“ Tuzla, aktivnije prati i aplicira na javne pozive domaćih i međunarodnih donatora, fondova Evropske unije i drugih finansijskih mehanizama radi obezbjeđenja sredstava za digitalizaciju, modernizaciju tehničke opreme i razvoj novih medijskih platformi.

**ANA PEJIĆ**

Molim vas da se izjasnite.  
Glasanje je okončano.  
Konstatujem da je pročitani zaključak usvojen sa,  
20 glasova za, nije bilo protiv i 3 suzdržana.

Možete dalje Slađana.

**SLAĐANA KRAJINA – sekretar Gradskog vijeća Tuzla**

Sljedeći prijedlog zaključka:

3. Gradsko vijeće Tuzla konstatuje da je JP RTV 7 d.o.o. Tuzla u 2025. godini, ostvarilo pozitivan finansijski rezultat i realizovalo značajne programske aktivnosti od javnog interesa za građane Tuzle.

**ANA PEJIĆ**

Molim vas da se izjasnite.  
Glasanje je okončano.  
Konstatujem da je pročitani zaključak usvojen sa,  
20 glasova za, nije bilo protiv i 3 suzdržana.

**SLAĐANA KRAJINA – sekretar Gradskog vijeća Tuzla**

Sljedeći prijedlog:

4. Gradsko vijeće Tuzla daje podršku daljem razvoju lokalnog javnog medijskog servisa kroz unapređenje programskih sadržaja, digitalnih platformi, tehničkih kapaciteta i vlastite produkcije.

**ANA PEJIĆ**

Molim vas da se izjasnite.

Glasanje je okončano.

Konstatujem da je pročitani zaključak usvojen sa,  
20 glasova za, nije bilo protiv i 3 suzdržana.

**SLAĐANA KRAJINA – sekretar Gradskog vijeća Tuzla**

5. Gradsko vijeće Tuzla smatra da JP RTV 7 d.o.o. Tuzla i u narednom periodu treba nastaviti jačati profesionalne standarde, objektivno informisanje građana, pluralizam mišljenja i ravnopravan pristup svim društvenim subjektima.

**ANA PEJIĆ**

Molim vas da se izjasnite.

Glasanje je okončano.

Konstatujem da je pročitani zaključak usvojen sa,  
20 glasova za, nije bilo protiv i 3 suzdržana.

**SLAĐANA KRAJINA – sekretar Gradskog vijeća Tuzla**

Sljedeći prijedlog:

6. Gradsko vijeće Tuzla zadužuje Upravu JP RTV 7 d.o.o. Tuzla da u narednom izvještajnom periodu dodatno prezentira pokazatelje gledanosti, slušanosti, digitalnog dosega i strukture prihoda, kako bi se mogla izvršiti još potpunija analiza efekata rada.

**ANA PEJIĆ**

Molim vas da se izjasnite.

Glasanje je okončano.

Konstatujem da je pročitani zaključak usvojen sa,  
19 glasova za, nije bilo protiv i 3 suzdržana.

**SLAĐANA KRAJINA – sekretar Gradskog vijeća Tuzla**

7. Gradsko vijeće Tuzla izražava zahvalnost zaposlenicima JP RTV 7 Tuzla na doprinosu informisanju građana i realizaciji programskih sadržaja od javnog interesa za grad Tuzlu, te smatra da njihov profesionalan i odgovoran rad treba biti adekvatno vrednovan kroz unapređenje uslova rada ali i povećanja plata i drugih primanja zaposlenih.

**ANA PEJIĆ**

Molim vas da se izjasnite.  
 Glasanje je okončano.  
 Konstatujem da je pročitani zaključak usvojen sa,  
 19 glasova za, nije bilo protiv i 3 suzdržana.

**SLADANA KRAJINA – sekretar Gradskog vijeća Tuzla**

Sljedeći prijedlog zaključka:

8. Gradsko vijeće Tuzla smatra da je potrebno i dalje razmotriti mogućnost promjene ili dopune naziva JP RTV 7 d.o.o. Tuzla, na način da naziv jasnije sadrži odrednicu „Tuzla“, bez RTV 7, kao npr. RTV Tuzla, radi jačanja lokalnog identiteta, prepoznatljivosti medija, promocije Grada Tuzla i unapređenja tržišne pozicije Društva na regionalnom medijskom prostoru.

**ANA PEJIĆ**

Molim vas da se izjasnite.  
 Glasanje je okončano.  
 Konstatujem da je pročitani zaključak usvojen sa,  
 19 glasova za, nije bilo protiv i 3 suzdržana.

**SLADANA KRAJINA – sekretar Gradskog vijeća Tuzla**

9. Gradsko vijeće Tuzla konstatuje da je JP „Gradska veterinarska stanica“ d.o.o. Tuzla u 2025. godini, ostvarila zapažene rezultate u izvršavanju poslova od javnog interesa iz oblasti veterinarske djelatnosti, veterinarskog javnog zdravstva i zaštite zdravlja građana.

**ANA PEJIĆ**

Molim vas da se izjasnite.  
 Glasanje je okončano.  
 Konstatujem da je pročitani zaključak usvojen sa,  
 18 glasova za, nije bilo protiv i 4 suzdržana.

**SLADANA KRAJINA – sekretar Gradskog vijeća Tuzla**

Sljedeći prijedlog:

10. Gradsko vijeće Tuzla izražava priznanje direktoru prof. dr. nauka Jasminu Ferizbegoviću, Upravi Društva, Nadzornom odboru, Odboru za reviziju i svim zaposlenicima JP „Gradska veterinarska stanica“ d.o.o. Tuzla za profesionalan, odgovoran i uspješan rad ostvaren tokom 2025. godine.

**ANA PEJIĆ**

Molim vas da se izjasnite.  
 Mirza, molim vas da se izjasnite, obzirom da ste u sali.

Glasanje je okončano.  
 Konstatujem da je pročitani zaključak usvojen sa,  
 19 glasova za, nije bilo protiv i 4 suzdržana.

**SLADANA KRAJINA – sekretar Gradskog vijeća Tuzla**

11. Gradsko vijeće Tuzla smatra da Grad Tuzla i u narednom periodu treba nastaviti pružati podršku razvoju kapaciteta JP „Gradska veterinarska stanica“ d.o.o. Tuzla, imajući u vidu njen značaj za zaštitu zdravlja ljudi, životinja i okoliša.

**ANA PEJIĆ**

Molim vas da se izjasnite.  
 Glasanje je okončano.  
 Konstatujem da je pročitani zaključak usvojen sa,  
 20 glasova za, nije bilo protiv i 3 suzdržana.

**SLADANA KRAJINA – sekretar Gradskog vijeća Tuzla**

I još jedan prijedlog zaključka:

12. Gradsko vijeće Tuzla smatra da ostvareni rezultati predstavljaju osnov da se kroz buduće planske i budžetske aktivnosti nastavi valorizacija rada zaposlenika JP „Gradska veterinarska stanica“ d.o.o. Tuzla, uključujući unapređenje uslova rada i materijalnog položaja zaposlenih adekvatnim povećanjem plata.

**ANA PEJIĆ**

Molim vas da se izjasnite.  
 Hoćete li da ponovimo? Možete molim vas Enisa samo poništiti.  
 Molim vas da se ponovo izjasnite o pročitanoj zaključku.  
 Glasanje je okončano.  
 Konstatujem da je pročitani zaključak usvojen sa,  
 19 glasova za, nije bilo protiv i 3 suzdržana.

Dajem pauzu od trideset minuta. Pauza od trideset minuta.

(Pauza).